

## Ar hoga mhö bi 'yot'a AR XUWA

*Nö'ö ar mhö mi 'buhwi Jö ba e bi njö'i*

<sup>1</sup> Har ndui nú'mu hinte mi jawa har ximhai, hinte mi janu mhets'i, Nö'ö Togo mar Mhö mi 'bu'ö, mi 'buhwi Jö, ne go gese Jö n'ehe.

<sup>2</sup> Har ndui, Nö'ö Togo mar Mhö, mi 'buhwi Jö.

<sup>3</sup> Ne gatho nö'ö te ja go bi hyok'ö. Nu'mu hinte xi hyoki, hinte di jamhö 'mu.

<sup>4</sup> Ge'ö hör te, ne nunar tenu gehnu ar ñot'i yot'wa yá mfeni ya jö'i.

<sup>5</sup> Nunar ñot'inu yot'a har 'bexui, ne nunar 'bexui hinxi za xi döhö.

<sup>6</sup> Mi 'bu n'ar ñ'ohö már thuhu ar Xuwa, xki mehna Jö.

<sup>7</sup> Ba 'behni ngu n'ar ndamajöni. Nunu bi damajöni togo ar ñot'i, ne njap'u nda ñ'emui gatho ya jö'i.

<sup>8</sup> Ar Xuwa hingo mi ge'ö ar ñot'i, honse ba ehe nda damajöni togo mar ñot'i.

<sup>9</sup> Nuna togo mar ñot'i majöni, ne yot'wa yá mfeni ya jö'i, ndi 'ñekwa har ximhai.

<sup>10</sup> Gese bi hyoka ar ximhai, ha nú'mu mba ekwa har ximhai bi m'ui, nuya jö'i himbi bödi togo'ö.

<sup>11</sup> Ba e hár haise, ha nuya mengunu himbi numansu.

<sup>12</sup> Ha nu'u togo bi numansu, ne bi ñ'emuiibi ár thuhu, bi t'umba ar ts'edi bi mbötsi Jö.

13 Nuyū hinto hōmpa ár ji, ne hinto di hñö'spa ár ndo'yo, hinxi m'ui ngetho xi ne n'ar ñ'ohö, hōnse Jö xi jap'u yá bötsi.

14 Nö'ö Togo mar Mhö ba e bi njö'i, ne da 'buhwihüwa. Xa mi ko ár nhwëki, ne himi tsaya mi mönga nö'ö majöni. Da handwabihe ár nsunda, ngu ár nsunda nö'ö n'ase ár T'u ar Dada bi 'bu mhets'i.

15 Ar Xuwa bi damajöni togo'ö, mi ñö nts'edi mi enö:

—Gehnu togo ndi xi'ahu ndi 'ñep'u m'efa. Ne nunu xa töka ár nsu, ngetho nú'mu hinge ndi m'ukatho, ha mi 'bu'ö.

16 Gathogihu xa di hömfu yá ñho, ne hiñham'u di k'athu ár nhwëki'ö.

17 Nuya 'bepate ba 'behna ar Moise bi utkagihu. Ha nupya xpa 'behna ar tsi Hmu Hesukristo, xpa hönju ar nhwëki ne nö'ö majöni.

18 Hinto xi hyanda Jö ar Dada. Nö'ö n'ase ár T'u bi 'buhwi ar Dada, gehnu xi utkagihu ár m'ui'ö.

*Ar Xuwa Xixthe bi damajöni*

*(Mt. 3:11-12; Mr. 1:7-8; Lk. 3:15-17)*

19 Gehnu ar mhö bi damajöni ar Xuwa Xixthe, nú'mu ya xodyo bi mehna ya möjö ne yá maxte xki 'ñe Herusalen, nda t'ambabi mi togo'ö.

20 Himbi nkoni bi damajöni bi 'ñenö:

—Nuga hindar Kristo.

21 Nu'u bi 'yambabi ne bi 'ñeñ'u:

—Xi'mu, togo'i. Hage gar m'ehni Elia.

Ar Xuwa bi dödi ne bi 'ñenö:

—Hin'ö, hingo geke.

Bi mengi bi t'ambabi ne bi t'embabi:

—Hage go ge'e ár döta m'ehni Jö ma nda ehe.

Bi dödi ne bi 'ñenö:

—Hin'ö.

<sup>22</sup> Bi mengi bi 'ñembabi'u:

—Xi'mu, togo'i. Xikagihe tema gi mönse go ge'a'i. Ne ga hö'sfe ar mhö nu'u togo xpa penkagihe ga k'ös'ahe.

<sup>23</sup> Ar Xuwa bi dödi ne bi 'ñembabi'u:

—Nuga go geke nö'ö bi mönga ar m'ehni Isaia: Ár mhafi n'a togo enga har ot'at'ohö: Jömfu ár 'ñu ar tsi Hmu.

<sup>24</sup> Nuya jö'i xki m'ehni ma yá ñ'ohu ya denga'bepate.

<sup>25</sup> Bi mengi bi 'yamba man'agi ar Xuwa ne bi 'ñeñ'u:

—Xi'mu, yo'ö gi xixthe nu'mu hingar Kristo, hingar Elia, hingar döta m'ehni Jö nda ehe.

<sup>26</sup> Ar Xuwa bi dödi ne bi 'ñenö:

—Nuga di xixthe'ihu har dehe, ha gi 'buhwihuwa n'a hingi pöhu togo'ö.

<sup>27</sup> Gehnu ndi enga nda 'ñep'u m'efa. Nunu xa töka ár nsu, hindi 'ñepkagi ga xot'wats'u ár nthöt'i yá thiza.

<sup>28</sup> Gathoyu ba tho núnu Betabara 'randi ar döthe Hordan, habu mi xixthe ar Xuwa.

### *Ar tsi Ntxöndöni ba pehna Jö*

<sup>29</sup> Nu ár hyax'öp'u, ar Xuwa mi hyanda ar Hesu ndi 'ñe nda züdi, bi 'ñenö:

—Ndi, ba ehnu togo xpa pehna Jö ngu n'ar tsi Ntxöndöni, da t'uni ngu ar m'öñho, ne da hñökwa yá ts'oki ya meximhai.

<sup>30</sup> Go gehnu togo ndi xi'ahu: 'Befa n'ar ñ'ohö xa töka ár nsu. Nú'mu hinge ndi m'ükatho, mi 'bu'ö.

<sup>31</sup> Nuga hinga ndi pödi togo'ö. Di xixthega ya jö'i har dehe, ne njap'u nda bö ya me Israel nú'mu nda e'ö.

<sup>32</sup> Ne ar Xuwa bi damajöni bi 'ñenö:

—Nuga da handwa ár Hñö Jö ba kö mhets'i ngu n'ar tsi domtxu, ba e bi zuhnu.

<sup>33</sup> Nuga hinga ndi pöhmö togo'ö. Nö'ö togo ba penkagi ga xixthe'ihu har dehe bi 'ñengagi: Ma gi hyandwa ár Hñö Jö da gö mhets'i, ne da zu n'ar ñ'ohö da m'uhiwi. Gehnu ma da xixthe'ihu ne gi hñömfu ár Hñö Jö.

<sup>34</sup> Nuga da handi, jange di damajöni go gehnu ár T'u Jö mhets'i.

### *Yá 'bet'o maxte ar Hesu*

<sup>35</sup> Ár hyax'ö man'agi mi 'bahwinu ar Xuwa yoho yá maxte.

<sup>36</sup> Mi hyanda ar Hesu mi thohnu bi 'ñenö:

—Ndi ba ehnu togo xpa pehna Jö ngu n'ar tsi Ntxönandöni, ma da t'uni ngu ar m'oñho.

<sup>37</sup> Nuya yoho yá maxte ar Xuwa mi 'yo njap'u, dama bi denga ar Hesu.

<sup>38</sup> Ar Hesu mi ñegi bi hyandi mi tenga nuya yohoyu, bi 'ñenö:

—Te gi hoñhu.

Nu'u bi dödi ne bi 'ñeñ'u:

—Rabi (pontho da 'ñenö Utate), habu gi 'bui.

<sup>39</sup> Nö'ö bi 'ñembabi'u:

—Möhö gi hyanthu.

Bi ma'u ne bi bödi habu mi 'bu'ö. Ne bi m'uhiwinu gatho nor pa'ö, ngetho mi tsu ngu n'ar goho nde.

40 Nu'u yoho yá m̄axte ar Xuwa bi 'yoxa nö'ö xki mö ne bi denga ar Hesu, n'a'u m̄ár thuhu ar Andre ár jödö ar Simu nö'ö bi t'embabi ar Pedro.

41 Nu mi ma'ö, m'et'o bi nthewi ar Simu ár jödö, ne bi 'ñembabi:

—Xta nthēhe ar Mesia (ne da 'ñenö ar Kristo).

42 Nep'u bi zi'spa ar Hesu. Ha nú'mu mi zoni, ar Hesu bi k'öt'i ne bi 'ñembabi:

—Nu'ge gar Simu ár t'u'i ar Honas. Nupya di hus'a'i gar Sefa (ne da 'ñenö ar Pedro).

*Ar Hesu bi zohna ar Lipe ne ar Natanael ngu yá m̄axte*

43 Ár hyax'ö bi benga ar Hesu nda ma har hai Ngalilea, ne nu mi ma, bi nthewi ar Lipe ne bi 'ñembabi:

—Ba e gi tēngagi.

44 Ar Lipe mar me Betsaida, ja ma ya mengunu ar Andre ne ar Pedro n'ehe.

45 Ar Lipe bi nthewi ar Natanael ne bi 'ñembabi:

—Xta nthēhe nö'ö togo xi nonga ar Moise hár t'ofö, ne ngu bi 'yot'a nu ma'ra yá m'ehni Jö. Gehnu ar Hesu ár t'u ar Huse me Nasare.

46 Ar Natanael bi 'ñenö:

—Hage da tsä di 'ñe n'ar ñhony har hnini Nasare. Nu'mú ar Lipe bi 'ñembabi:

—Ba e gi hyandase.

47 Ar Hesu mi hyanda ar Natanael ndi 'ñe nda zudi, bi 'ñenö:

—Hyanthu, xi 'ñekwa n'ar me Israel hingar nemhñö.

48 Nu'mú ar Natanael bi 'ñemba ar Hesu:

—Hanja gi pökagi.

Ha nu ar Hesu bi döt wabi:

—Nú'mu hinxki zo'atho ar Lipe ngi e ngi k'öskagi, da hant'a'i ngi 'ba hár wa ar 'bai'iuxi.

<sup>49</sup> Ar Natanael bi dödi ne bi 'ñenö:

—Utate, nu'ge go ár T'u'i Jö, ne go ge'e ár Ndö ya me Israel.

<sup>50</sup> Ar Hesu bi dödi ne bi 'ñembabi:

—Hage ga ñ'emui nú'mu honse da xi'a'i da hant'a'i ngi 'ba hár wa ar 'bai'iuxi. Nuya pa xi 'ñep'u ma gi hyanda ma'ra ya döta nt'udi.

<sup>51</sup> Ne bi 'ñembabi:

—Xa majöni di xi'a'i, nunar panu ne nuya di 'ñep'u, ma gi hyanda mhets'i di xogi, ne gi hyandwa yá enxe Jö di pots'e ne di köi da zu Nö'ö Togo ba e bi Njö'i.

## 2

### *N'ar nthöti núnu har hnini Nkana*

<sup>1</sup> Ár hñupa bi nja n'ar nthöti núnu Nkana har hai Ngalilea. Ka mi 'buhnu ár nönö ar Hesu n'ehe.

<sup>2</sup> Ar Hesu ne yá maxte bi nsipabi nda ma har ngo n'ehe.

<sup>3</sup> Nú'mu mi k'at'a ar ixkat'afi, ár nönö ar Hesu bi 'ñembabi:

—Bi the ar ixkat'afi.

<sup>4</sup> Ha nu ar Hesu bi 'ñenö:

—Yo'ö gi xikagiga, tsi 'behñö. Hinxi zota ar pa da nheki ma ts'edi.

<sup>5</sup> Nep'u ár nönö bi 'ñemba nu'u mi faxte har ngo:

—'Yothu gatho nö'ö da xi'ahu.

<sup>6</sup> Ne mi tihnu 'rato ya döta moto mi sit'a ar dehe, ngu yá nt'umbi ya xodyo ja mi nt'axkunu. Mi ñ'enga ngu hñu wa goho xoni ar dehe n'a ngu n'a ya motoyu.

<sup>7</sup> Ar Hesu bi 'ñemba ya 'bego:

—Ñu'su ar dehe nuya motoyu.  
Ne nu'u bi ñuts'i xiñho, xa bi 'baxki.

<sup>8</sup> M'efa bi 'ñembabi n'ehe:

—'Yathu ne hñö'spabihu ár ndö nunar ngonu.

Nu'u bi hñö'spabi'ö.

<sup>9</sup> Nunár ndö ar ngo mi za ar dehe xki ñ'ixkat'afi, himi pöñnu habu xki 'ñehe. Honse nuya 'begoyu mi pö'u xki 'yat'u har dehehmö. Nunar ndö 'mu bi ma ba zo nö'ö togo xki nthöti.

<sup>10</sup> Ne bi 'ñembabi:

—Gatho nu'u togo ot'a n'ar ngo, m'et'o unga ar hoga ixkat'afi, ne nú'mu xi nithe nu'u xi ts'ohni, unga nö'ö hints'u ho. Ha nu'ge xka kwata nö'ö xiñho, ne ja xka umpya.

<sup>11</sup> Gehnu ar 'bet'o dötant'udi bi 'yot'a ar Hesu núnu Nkana har hai Ngalilea. Bi ñ'u ár nsunda ne nuyá maxte bi ñ'emubi.

<sup>12</sup> Nep'u ar Hesu bi ma Nkapernaum, bi mewi ár nönö, yá jödö ne yá maxte. Ka ba 'buhnu 'ra ya tsi pa.

*Ar Hesu bi paxt'a ar dönganijö*

*(Mt. 21:12-13; Mr. 11:15-18; Lk. 19:45-46)*

<sup>13</sup> Nú'mu mi 'bap'utho ar baxjwa ár dango ya xodyo, ar Hesu bi bõts'e bi ma Herusalen.

<sup>14</sup> Mi zonu bi hyanda 'ra mi 'buhnu hár thi ar dönganijö mi pa ya boi, ya deti, ya domtxu, ne mi huhnu ya patbojö.

<sup>15</sup> Ar Hesu bi hyoka n'ar nk'enxi nthöhi, ne bi 'yenga nuya ma, mahyegiwi yá deti ne yá boi mi 'bu har nijö. Bi font'wa yá bojö ya patbojö ne bi püspa yá mexa.

<sup>16</sup> Ne bi 'ñemba nu'u togo mi pa ya domtxu:

—Jujuwayu, yo gi jafu ár ngu ma Dada n'ar tai.

17 Nu'mú, nuyá m̄axte bi beñ'u xki t'ot'a hár T'ofó Jö habu enö: Di tuse di sup'a ri ngu.

18 Nuya ndöxodyo bi 'ñemba ar Hesu:

—Tema dötant'udi gi utkagihe, njap'u ga pöhe togo xi 'ra'a ar ts'edi gi 'yot'a njap'u.

19 Ar Hesu bi dödi ne bi 'ñembabi'u:

—Hwathu nunar nijönu, ne ár hñupa ga pengi ga juxa man'agi.

20 Nu'mú nuya xodyo bi 'ñeñ'u:

—Yon'atema'rato njeje bi njuxa nunar nijönu. Hage hñupatho gi juxa man'agi.

21 Nunar nijö mi nonga ar Hesu gehnu ár ndo'yose.

22 Ha nú'mu mi mengi bi nte man'agi ar Hesu, nuyá m̄axte bi beñ'u xki mönga njap'u, ne bi ñ'emui'u gatho nö'ö xki t'ot'a hár T'ofó Jö, ne nö'ö mi mönga ar Hesu.

### *Ar Hesu pötwatho yá mfeni ya jö'i*

23 Nu mi 'buhnu Herusalen har dango mbaxjwa, nzeje ya jö'i bi ñ'emui ar Hesu, mi hyanda ya nt'udi mi ot'ö.

24 Ha nö'ö himi ñhetho, ngetho mi pötwatho yá mfeni'u.

25 Ne himi hoñ'ö togo nda xipabi tengu yá m'ui ya jö'i, ngetho nö'ö mi pötho tema mi benga n'a ngu n'a'u.

## 3

### *Ar Hesu ne ar Nikodemo*

1 Mi 'bu n'ar ñ'ohö mar denga'bepate már thuhu Nikodemo, mar ndö mada yá mixodyowi.

2 Nunu ba e nxui bi k'önga ar Hesu ne bi 'ñembabi:



—Utate, di pöhe xpa peñ'a Jö ngu ár utate, ngetho hingi tsá to da 'yot'a nuya nt'udi gi otge nu'mu hingi 'buhwi'ö.

<sup>3</sup> Ar Hesu bi döti ne bi 'ñembabi:

—Xa majöni di xi'a'i, nö'ö togo hinda mengi da m'u man'agi, hinda tsá da hyandwa ár ts'ut'wi Jö.

<sup>4</sup> Ar Nikodemo bi 'ñembabi:

—Hanja tsá da mengi da m'u man'agi n'ar ñ'ohö xi ndönzia. Hage tsá da yut'a hár muí ár nönö man'agi, ne da mengi da m'ui.

<sup>5</sup> Bi dötwa ar Hesu:

—Xa majöni di xi'a'i, nö'ö togo hinda m'u har dehe ne hár Hñö Jö, hinda tsá da yut'a hár ts'ut'wi Jö.

<sup>6</sup> Nu'u to gatho xi 'yonga n'ar jö'i, ar jö'i n'ehe. Ha nu'u xi umba ár te ár Hñö Jö, ar hñö n'ehe.

<sup>7</sup> Yo gi 'yo nu'mu di xi'a'i, mahyoni gi pengi gi m'u man'agi.

<sup>8</sup> Ar ndöhi habu gatho 'yo ne gi ode bu, ha hingi pödi habu xpa ehe, wa habu di ma. Njap'u nu'u xi m'u man'agi xi nzinga ár Hñö Jö.

<sup>9</sup> Ar Nikodemo bi dödi ne bi 'ñembabi:

—Hanja tsá da tho njap'u.

<sup>10</sup> Ar Hesu bi dödi ne bi 'ñenö:

—Ár utate'i ya me Israel, yo'ö hingi pöhyu.

<sup>11</sup> Xa majöni di xi'a'i, nö'ö di pöhe di xi'ahu, ne nö'ö xta hanthe di dahe majöni, ha nu'ahu hingi ñ'emuihu nö'ö di xi'ahe.

<sup>12</sup> Nu'mu hingi ñ'emuihu nö'ö di xi'ahu di hekwa nö'ö te jawa har ximhai, hanja ma gi ñ'emuihu nu'mu ga xi'ahu nu'u te janu mhets'i.

<sup>13</sup> Hinto xi boxa mañö mhets'i, gese'ö ba kö mhets'i, gehnu Togo ba e bi Njö'i, ar mengunu.

14 Ne njangu ar Moise bi tsuta n'ar k'eñö ha n'ar za, nú'mu mi 'yo ya me Israel ha ya ot'at'ohö, ma da njap'u Nö'ö Togo ba e bi Njö'i, mahyoni da ts'uta ha n'ar za n'ehe.

15 Ne gatho nu'u togo da ñ'emui, hinda m'edi, ma da mes'u ar te hiñham'u da göts'i.

### *Jö xa bi mö ya meximhai*

16 Jö xa bi mö ya meximhai, jange bi unga nö'ö n'ase ár T'u, ne njap'u gatho nu'u togo da ñ'emui, hinda m'edi, ma da me'sa ar te hiñham'u da göts'i.

17 Ngetho Jö hinxpa pehna ár T'u har ximhai da mehna har 'bexui ya meximhai. Xpa pehni da pohyu.

18 Nö'ö togo da ñ'emui'ö, hinda ma da 'behna har 'bexui. Ha nö'ö togo hinda ñ'emui, xi t'ekwabi da 'behna har 'bexui, ngetho himbi ñ'emui'ö nö'ö n'ase ár T'u Jö.

19 Nu'u ma da m'ehna har 'bexui, ngetho ar hyats'i ba ekwa har ximhai, ha nu'u xa bi mö ar 'bexui, ngetho himi ot'u nö'ö xiñho.

20 Gatho nu'u togo ot'a nö'ö hingi ho, utsal ar hyats'i, ne hingi kwat'i, njap'u hinda nheki hingi ho nö'ö ot'e.

21 Ha nö'ö togo ot'a nö'ö majöni, kwat'a har hyats'i, honi da nheki nö'ö ot'e, ngetho ot'e jumpa ár ts'edi Jö.

### *Ár'yate ar ñ'ohö nthöti*

22 M'efa ar Hesu bi mewi yá maxte har hai Nhudea, ne ka ba 'buhnu 'ra ya pa, mi xixthe ya jö'i.

<sup>23</sup> Ar Xuwa n'ehe mi xixthe núnu Enon get'u ar hnini Salim, ngetho mi janu nzeye ar dehe. Jange ya jö'i mi panu nda nxixthe'u.

<sup>24</sup> Gathoyu bi thogi nú'mu hinxki t'et'atho ar fadi ar Xuwa.

<sup>25</sup> Nu'mu yá maxte ar Xuwa bi ntsahñökiwi yá mixodyowi, mi noñ'u ar xixthe nt'axki.

<sup>26</sup> Bi ma ba k'ö'sa ar Xuwa, ne bi ñembabi:

—Utate, nunar ñ'ohö ga nthewi 'randi ar döthe Hordan, nö'ö ga damajöninu, xixthe n'ehe, ne gatho ya jö'i pa bi tsudi.

<sup>27</sup> Ar Xuwa bi dödi ne bi ñenö:

—Hinto tsä te da me'sase nu'mu hingo xi umba Jö.

<sup>28</sup> Nu'ahu xka 'yosehu nú'mu nda enö: Nuga hendar Kristo. Hönse xpa 'benkagi ga 'bet'o.

<sup>29</sup> Njangu n'ar ñ'ohö ma da nthöti, go ma da zixa ar 'behñö'ö, ha nö'ö ar 'yate ñ'owi, oxa nö'ö te mö ne xa johya. Di njagap'u n'ehe, di johya di o nö'ö te thogi.

<sup>30</sup> Ngetho mahyoni da hñuxa ár nsu'ö, ne nuga da the ma nsu.

### *Nö'ö ba e mhets'i*

<sup>31</sup> Nö'ö xpa e mhets'i töpa ár nsu nuya 'bukwa har ximhai. Ha nuya meximhai ár meti ar ximhai, ne hönse mönga nö'ö te jawa. Hö, töte ár nsu nö'ö togo xpa e mhets'i.

<sup>32</sup> Nunu xipa ya jö'i te xpa ode ne xpa handnu, mödi njap'u hinto ñ'emui nö'ö möñ'ö.

<sup>33</sup> Nu'u togo homba ár mhö, ñ'u njap'u majöni nö'ö mönga Jö.

<sup>34</sup> Nö'ö togo xpa pehna Jö, mömba ár mhö'ö, ngetho Jö hingi embatho ár Hñö umbabi.

<sup>35</sup> Jö ar Dada xa mö ár T'u, jange xi 'yent'wa gatho hár 'ye.

<sup>36</sup> Nö'ö togo ñ'emui ar T'u, pe'sa ar te hiñham'u da göts'i. Ha nö'ö hingi ne da ñ'emui ar T'u, hinda ma da me'sa nunar tenu, honse ár kwe Jö ma da nthexkwi'ö.

## 4

### *Ar Hesu ne ar 'behñö me Nsamaria*

<sup>1</sup> Nú'mu mi bö ar tsi Hmu xki zo yá gu ya denga'bepeate nö'ö mi pe ya jö'i, mi eñ'u: Ar Hesu xa xixthe nzeyē ya jö'i, töta ar Xuwa Xixthe

<sup>2</sup> (mödi ar Hesu hingo mi xixthe'ö, yá maxte go mi ot'u).

<sup>3</sup> Ne bi bonga har hai Nhudea, bi menga man'agi har hai Ngalilea.

<sup>4</sup> Mi mahyoni nda thota har hai Nsamaria.

<sup>5</sup> Jange mi thohnu Nsamaria, ba e ha n'ar hnini ár thuhu Sikar, get'u habu 'bu ár hai ar Hakob xki zokwa ar Huse ár t'u.

<sup>6</sup> Ka mi 'buhnu n'ar pothe, mi t'embabi ár pothe ar Hakob. Nu mi thohnu ar Hesu, xki zabi mi ne ar 'ñu, bi ma ba huhnu habu mi 'bu ar pothe, mi tsu ngu made mpa.

<sup>7</sup> Ba e har pothe n'ar 'behñö me Nsamaria nda 'yat'a ar dehe, ne ar Hesu bi 'ñembabi:

—'Raka n'a tsi tui ar dehe ga tsi.

<sup>8</sup> Ha nuyá maxte xki ma har hnini, ma nda danga te nda zi'u.

<sup>9</sup> Nunar 'behñö me Nsamaria bi 'ñemba ar Hesu:

—Hanja gi akar dehe, ngetho gar xodyo, ha nuga dar me Nsamaria.

Bi mönga njap'u ngetho nuya xodyo himi ne nda ntsixkwi ya me Nsamaria.

<sup>10</sup> Nu'mú ar Hesu bi dödi ne bi 'ñembabi:

—Nu'mu gi pötwahmö ár nt'uni Jö, ne nu'mu gi pöhmö togo a'a ar dehe, go xka 'yakagi 'mu, ne nuga xta 'ra'a ar dehe unga ar te.

<sup>11</sup> Ne nunar 'behñö bi 'ñenö:

—Tsi Tata, nunar pothe xi ñhe, ne hinte gi hö te gi 'yat'i. Habu ma gi hö ar dehe unga ar te 'mu.

<sup>12</sup> Hage gi töpke ár nsu ma palehe ar Hakob togo bi zogagihe nunar pothenu. Ka mi tsithewa'ö, yá t'u ne gatho yá meti.

<sup>13</sup> Ar Hesu bi dödi ne bi 'ñembabi:

—Nu'u togo da zi nunar dehenu, ma da mengi da ntuthe.

<sup>14</sup> Ha nö'ö togo da zi nunar dehe di unga, hinda ma da mengi da ntuthe. Ngetho nunar dehe ga umbabi, ma da njangu n'ar pothe hár mu, unga ar dehe hiñham'u da xa.

<sup>15</sup> Nu'mú nunar 'behñö bi 'ñembabi:

—Tsi Tata, 'raka nö'ö ar dehe'ö. Njap'u hinga pengi ga ntuthe, ne hinga e ga höxa ar dehe.

<sup>16</sup> Ar Hesu bi 'ñembabi:

—Di ma ba tsi ri döme, ne gi penga injawa.

<sup>17</sup> Ar 'behñö bi dödi ne bi 'ñenö:

—Hinte ma döme di 'ñehe.

Ar Hesu bi 'ñembabi:

—Majöni nö'ö xka mö, hinte gi 'ñe ri döme.

<sup>18</sup> Ngetho kut'a ya ndo xka 'ñehe, nö'ö gi 'buhwipya hingo ri döme. Jange majöni nö'ö xka mö, hinte ma döme gi 'ñehe.

<sup>19</sup> Nu'mú bi 'ñemba ar 'behñö:

—Tsi Tata, gar m'ehni Jö ngubeni.

20 Numa palehe bi ndönga Jö núnu har t'ohonu. Ha nu'ahu gar xodyohu, gi eñhu mahyoni da ndönga Jö núnu Herusalen.

21 Ar Hesu bi 'ñembabi:

—Ma ga xi'a'i, nönö, ma da zo ar pa númu gatho nu'u togo ne da ndönga Jö ar Dada, hinda ma da ekwa har t'ohonu, ne hinda manu Nherusalen.

22 Nu'ahu gi ndöñhu nö'ö hingi pöhu, ha nuje hö, di pöhe togo di ndöñhe, ngetho ar mpoho bi e ha ya xodyo.

23 Xi 'ñep'u ar pa ne xi zopya, númu togo majöni ndönga Jö ar Dada, da 'yot'e di ponga hár müi ne ngu nö'ö majöni, ngetho ar Dada hongä togo da ndönga njap'u.

24 Jö ar hñö, ne hingi nheki. Jange nu'u togo da ndöni, mahyoni di ponga hár müi ne ngu nö'ö majöni.

25 Bi 'ñenga ar 'behñö:

—Di pödi ma da e ar Mesia nö'ö t'embabi ar Kristo, ne númu xta e'ö, ma da 'yotkagihe xiñho ar 'ñu.

26 Ar Hesu bi 'ñembabi:

—Go geke togo di ñöwipya.

27 Ge'mu bi zo yá maxte, ne nu'u xa bi 'yotho bi hyant'u ar Hesu mi ñöwi n'ar 'behñö, mödi hinto bi ñ'ani tema mi ambabi, wa tema mi mpe'u.

28 Nu'mu nunar 'behñö dama bi zop'u ár xoni, bi nixt'i bi ma har hnini, ne bi 'ñemba gatho ya jö'i:

29 —Ba ehü gi hyanthu n'ar ñ'oho xi xikagi gatho nö'ö xta ot'e. Ha hinga gehnu ar Kristo 'mu.

30 Nu'mu nzeye ya jö'i ba ponga har hnini, ba e bi k'öts'i.

31 Nu mi ma ar 'behñö, nuyá ma<sub>x</sub>te mi pe<sub>m</sub>babi'u ar Hesu mi embabi:

—Utate, ba e gi ñuni.

32 Ha nö'ö bi 'ñembabi'u:

—Di pe'ska n'ar ñhuni di tsi, nö'ö hingi pöhu.

33 Nuyá ma<sub>x</sub>te mi enga n'a ngu n'a:

—Hage to xpa hömpa te da zi 'mu.

34 Ar Hesu bi 'ñembabi'u:

—Numa ñhuniga, ga ot'wa ngu ne nö'ö togo xpa pe<sub>n</sub>kagi, ne ga jwata gatho nö'ö xi 'be<sub>p</sub>kagi.

35 Nu'ahu gi eñhu, 'beta goho nzönö da zo ar sofo. Ha nuga di xi'ahu: Ndi, hyanthu ya 'bot'i xi ñöts'i da nsofo.

36 Nuya xathe hönga ar nthöhö ne juxa ya sofo hiñham'u thege, jange nuya xofo njohyawu ya mot'i.

37 Xa majöni nö'ö engar jö'i: N'añ'o togo pot'i ne man'a togo xofo.

38 Nuga di peñ'ahu gi munsu ya jö'i, ngu n'ar xofo nö'ö hinxka mpehu. Ma'ra togo xi mpot'i, ne nu'ahu go xka johu ar sofo.

39 Ne nze<sub>y</sub>e ya mengu ar hnini'ö har hai Nsamaria, bi ñ'emui mi 'yo'u nö'ö mi damajöni nunar 'behñönu, mi enö: Xi xikagi gatho nö'ö xta ot'e.

40 Nú'mu mi zonga ya me Nsamaria habu mi 'bu ar Hesu, bi 'yapa ar möte nda gohnu, ne bi gohnu yopa.

41 Ne ma nze<sub>y</sub>e bi ñ'emui mi 'yo nö'ö te mi möñ'ö.

42 Ne mi embabi'u ar 'behñö:

—Nupya di ñ'emuihe hinge honse da ohe nö'ö ga xikagihe. Xta osehe nö'ö mö, ne di pöhe xiñho

go gehnu ar Kristo togo xpa 'behni da po ya meximhai.

*Ar Hesu bi othebi ar t'u ar maxte n'ar ndö*

<sup>43</sup> Ár yopa bi gu ar 'ñu man'agi ndi ma Ngalilea.

<sup>44</sup> Ngetho ar Hesu xki dase majöni bi 'ñenö, n'ár m'ehni Jö hingi t'e'spa ár nsu hár haise.

<sup>45</sup> Mi zonga Ngalilea, nuya mengunu bi numañho, ngetho xki hyanda gatho nö'ö xki 'yot'a núnu Herusalen har dango. Nuya pa'u ka mi 'buhnu'u n'ehe.

<sup>46</sup> M'efa ar Hesu bi ma man'agi núnu Nkana har hai Ngalilea, habu xki japa ar dehe xki ñ'ixkat'afi. Núnu Nkapernaum ka mi 'buhnu n'ár maxte ar ndö togo mi hñenga ár bötsi.

<sup>47</sup> Nu mi 'yohnu ar Hesu ba tsop'u Nhudea, ba e Ngalilea, bi ma ba apabi nda e nda hyandwa ár bötsi, ngetho mi tx'uda ár te.

<sup>48</sup> Ne ar Hesu bi 'ñembabi:

—Nu'ahu, nu'mu hingi hyanthu ya dötant'udi, hingi ñ'emuihu.

<sup>49</sup> Nunár maxte ar ndö bi 'ñenö:

—Tsi Hmu, ba e ngut'a, 'butho da du ma t'u.

<sup>50</sup> Ar Hesu bi 'ñembabi:

—Di ma, ri t'u 'bui xiñho.

Ne nunar ñ'ohonu bi ñ'emui nö'ö bi nsipabi, bi gu ár 'ñu bi ma.

<sup>51</sup> Nú'mu mi 'yo ar 'ñu ndi ma ár ngu, nuyá 'bego ba e bi dödi, ne bi 'ñeñ'u:

—Ri t'u 'bui xiñho.

<sup>52</sup> Nö'ö bi 'yambabi ham'u bi ndui bi m'u xiñho. Nu'u bi 'ñembabi:

—Mande, ngu n'ar nde bi hye ar mpat'i.



<sup>53</sup> Nunár dada ar bötsi bi beni ge'mu xki xipa ar Hesu mi 'bu xiñho ár t'u, ne bi ñ'emuiwi gatho yá mēni.

<sup>54</sup> Go gehnu ár ñoho ar döta nt'udi bi 'yot'a ar Hesu núnu Ngalilea nú'mu mba penga Nhudea.

## 5

### *Ar ñ'ohö xki nza ár ndo'yo núnu Betesda*

<sup>1</sup> M'efa bi dat'a n'ár dango ya xodyo núnu Herusalen, ne ar Hesu bi manu n'ehe.

<sup>2</sup> Núnu Herusalen ka 'buhnu n'ar pothe t'embabi Betesda har hñö ebreo, ne pe'sa kut'a ya m'et'e, 'bu get'u ar goxthi t'embabi ar Goxthideti.

<sup>3</sup> Ka mi 'bonu nzeye ya dathi, ya goda, ya dowa ne nu'u xki nza yá ndo'yo, gathoyu mi to'mi nda mfe'sa ar dehe.

<sup>4</sup> Ngetho mi jar pa mi kö n'ár enxe Jö mi wönt'a ar dehe, ne nö'ö togo nda ntöte nda yut'a m'et'o har dehe, nö'ö nda dixa tsant'ö ar hñeni mi thogi.

<sup>5</sup> Ne mi 'buhnu n'ar ñ'ohö mi pe'sa n'atema'ret'a ne hñöto njeye mi hñeni.

<sup>6</sup> Ar Hesu bi hyandi mi 'benu, mi bödi mi pe'sa nzeye ya jeye mi njap'u, bi 'ñembabi:

—Ha gi ne da dix'a'i.

<sup>7</sup> Ar dathi bi dödi ne bi 'ñembabi:

—Tsi Tata, hinto di 'ñe togo da maxkagi ga kut'a har dehe nú'mu xta mfets'i, ngetho nú'mu di pahmö ga kut'i, man'a tökagi da yut'a m'et'o.

<sup>8</sup> Ar Hesu bi 'ñembabi:

—Nangi, juxa ri fidi ne 'yo.

<sup>9</sup> Ne nunar ñ'ohönu dama bi dits'i, bi guxa ár fidi ne bi ñ'o. Ha nor pa'ö mar pa ntsaya.

10 Jange nuya ndöxodyo bi 'ñembabi nunar ñ'ohö xki t'othe:

—Ar pa ntsayäpya, hingi ho gi hñöxa ri fidi.

11 Nunar ñ'ohö xki dits'i bi 'ñembabi'u:

—Nö'ö togo bi othege, gese'ö bi 'ñengagi: Juxa ri fidi gi 'yo.

12 Ne nu'u bi 'yambabi:

—Togo bi xi'a'i gi juxa ri fidi gi 'yo.

13 Ha nunar ñ'ohö xki dits'i, himbi bödi togo xki othe, ngetho mi 'buhnü nzeýe ya jö'i, ha nunar Hesu xki ma.

14 M'efa ar Hesu bi nthewi har nijö nunar ñ'ohönü mi hñemhö, ne bi 'ñembabi:

—Ha gi ode, nu'ge bi dix'a'i. Yo ma gi pengi gi 'yot'a ar ts'oki, yo ma da 'ñep'a'i n'ar thogi di töte ár döta.

15 Nep'u nunar ñ'ohönü bi ma ba k'ö'sa ya ndöxodyo, bi xipabi'u ar Hesu go xki othe'ö.

16 Jange nuya ndöxodyo xa mi utsa ar Hesu, ne xa mi nemhö'u nda hyo, ngetho mi ot'a ya döta nt'udi har pa ntsaya.

17 Nu'mú ar Hesu bi 'ñembabi'u:

—Ma Dada hinxi ntsaya mpefi, di njagap'u n'ehe.

18 Mi 'yoxa nuya mhöyü, nuya ndöxodyo xa bi hñuxa yá kwe. Ne mi ne nda hyo'u, ngetho himi ot'a nö'ö mönga har t'ofö habü nonga ar pa ntsaya, ne mi embasé Jö go már Dada, njap'u mi ñhuxkwi.

### *Ar ts'edi pe'sa ár T'u Jö*

19 Nu'mú ar Hesu bi dödi ne bi 'ñembabi'u:

—Xa majöni di xi'ahü, hinte tsä te da 'yot'ase ár T'u Jö. Tenda nö'ö ot'a ár Dada, ngetho gathö nö'ö ot'a ar Dada, ot'a ar T'u n'ehe.

20 Jö ar Dada xa mö ár T'u jange uta gatho nö'ö te ot'ö. Ne ma da uta ma'ra xa di thota ár döta, ne xki hyanthu xa gi 'yohu.

21 Jö ar Dada ko'spa yá te nu'u xi du, njap'u ár T'u n'ehe umba ár te nu'u togo da ne'ö.

22 Jö ar Dada hinto hö'spa majöni, ngetho gatho bi 'yent'wa hár 'ye ár T'u, go da hñöxa majöni'ö.

23 Ne njap'u gatho ya jö'i da 'ñe'spa ár nsu ar T'u, ngu t'e'spa ár nsu Jö ar Dada. Nö'ö togo hingi e'spa ár nsu ar T'u, hingi e'spa ár nsu ar Dada togo xpa pehni.

24 Xa majöni di xi'ahu, nö'ö togo jamasu nö'ö di mö, ne ñ'emui Jö togo xpa penkagi, pe'sa ar te hiñham'u da göts'i. Ne hinda 'behna har 'bexui, ngetho 'butho xki du, ne bi mengi bi me'sa n'ar 'ra'yo te.

25 Xa majöni di xi'ahu, xi 'ñep'u ar pa, ne xi zopya, nú'mu nu'u xi du ma da 'yo ár mhö ár T'u Jö, ne nu'u togo da 'ñet'a ár mui, ma da me'sa ar te hiñham'u da göts'i.

26 Ngetho jangu Jö ar Dada höse ar te, njap'u xi umba ar ts'edi ár T'u da hñöse ar te n'ehe.

27 Ne xi 'yent'wa hár 'ye ár T'u da hñö'spa majöni gatho ya jö'i, ngetho go ba e bi njö'i'ö.

28 Yo gi 'yohu nu'mu di xi'ahu njap'u, ngetho ma da zo ar pa, nu'u to gatho xi t'agi ma da 'yo'spa ár mhö ár T'u Jö.

29 Ne nu'u togo xi 'yot'a nö'ö xiñho, ma da nangi da me'sa ar te hiñham'u da göts'i. Ha nu'u togo xi 'yot'a nö'ö hingi ho, ma da nangi da 'behna har 'bexui.

*Nu'u damajöni togo ar Hesu*

<sup>30</sup> Nuga hingi tsa te ga ot'ase. Ngu di ode xika ma Dada, njap'u di ot'a ar ts'ut'wi. Ne ma ts'ut'wi xiñho, ngetho hindi ot'a ngu di nega, di ot'e ngu ne ma Dada togo xpa penkagi.

<sup>31</sup> Nu'mu ga mönse togogi, hinter me nö'ö di mö.

<sup>32</sup> 'Bui n'a togo damajöni togogi, ne di pödi pe'sa ár nsu nö'ö möñ'ö.

<sup>33</sup> Nu'ahu ga peñhu 'ra togo ma ba amba ar Xuwa togogi, ne nö'ö bi damajöni togogi.

<sup>34</sup> Ha nuga hindi hongda da damajönigi n'ar jö'i. Nu'mu xta xi'ahu njap'u, di honi gi mpohu.

<sup>35</sup> Ar Xuwa mi ñhehwi n'ar ñot'i. Nö'ö mi xi'ahu mi yot'a ri mfenihu, ne ga njohyahu 'ra ya tsi pa ngi oxu.

<sup>36</sup> Ha nuya 'befi di pefi töpa ár ts'edi ar Xuwa da damajöni togogi. Ngetho di pe ar 'befi ba penkagi Jö ga jwati, ne nuya 'befiyu damajöni ge'ö xpa penkagi.

<sup>37</sup> Ma Dada togo ba penkagi go damajöni n'ehe togogi, mödi hinxka 'yohu xi ñö, ne hinxka hyanthu tengu'ö.

<sup>38</sup> Hingi pe'sfu ár mhö ha ri muihu, ngetho hinga ñ'emuihu togo ba peñ'ö.

<sup>39</sup> Hñethwu ár T'ofö Jö, ngetho gi kaxmbenihu ka gi tiñhunu ar te hiñham'u da göts'i. Hinxi zoda ri mfenihu ka nongaginu.

<sup>40</sup> Ne hingi ne gi ñ'emuiyihu, ne gi pe'su ar te hiñham'u da göts'i.

<sup>41</sup> Nuga hindi honi da 'ñeska ma nsu ya jö'i.

<sup>42</sup> Di pötho nu'ahu hingi pe'sfu ár mhöte Jö.

<sup>43</sup> Nuga xta e di pöta Jö ar Dada, ne hingi numañhogihu. Nu'mu da ehmö n'ar jö'i di e di nonse ár thuhuse, nu'mú hö, gi numansuhu.

44 Hingi tsa gi ñ'emuihu, ngetho m'et'o gi hoñhu da t'es'ahu ri nsuhu n'a ngu n'a, ne hingi hoñhu da 'ñes'ahu ri nsuhu nö'ö n'ase Jö.

45 Yo gi beñhu ma ga dat'a'ihu hár nthandi Jö ma Dada. Nö'ö togo ma da da'ahu, gese ar Moise togo gi kaxmbenihu ma da ñöñ'ahu.

46 Ngetho nu'mu gi ñ'emuihmöhu ar Moise, gi ñ'emui'ihu 'mu, ngetho ar Moise bi 'yot'a ar t'ofonongagi.

47 Ha nu'mu hingi ñ'emuihu nö'ö bi 'yot'ö, hinda tsa gi ñ'emuihu nö'ö di mönga.

## 6

*Ar Hesu bi 'winga tho ngudminthebe ya jö'i  
(Mt. 14:13-21; Mr. 6:30-44; Lk. 9:10-17)*

1 M'efa ar Hesu bi 'ranga 'randi ar dehe habu ár thuhu Ngalilea, get'ö ar ñhonthé Tiberia.

2 Ha nzeye ya jö'i bi deni, ngetho xki hyanda ya nt'udi mi ot'e, nú'mu mi othe ya dathi.

3 Nu'mu ar Hesu bi boxa mañö ar t'ohö ne ka ba huxkwinu ya maxte.

4 Mi 'bap'u'utho ar baxjwa ár dango ya xodyo.

5 Ar Hesu mi hyanda ra nzeye ya jö'i xki 'ñe nda zudi, bi 'ñemba ar Lipe:

—Habü ga tañhu ya thuhme ga 'wiñhu gatho nuya jö'iyu.

6 Bi xipa njap'u mi ne nda tsata ar Lipe, ngetho ar Hesu mi pödi teme nda mefi.

7 Ar Lipe bi dödi ne bi 'ñembabi:

—Nunar nthöhö hōnga yonthebe ya jö'i n'a pa, hinda wadi ga tañhu ar thuhme ga hemfu n'a tsi xeni n'a ngu n'ayu.

<sup>8</sup> N'a mbi dōta n'ár m̄axte ár thuhu ar Andre, ár jödō ar Simu nō'ō mi t'embabi ar Pedro, ne bi 'ñenō:

<sup>9</sup> —'Bukwa n'ar bōtsi hō kūt'a ya tsi thuhmesebada ne yoho ya tsi hwō. Te di nōmbabiyu.

<sup>10</sup> Nu'mú ar Hesu bi 'ñemba yá m̄axte:

—Xifu ya jō'i da hñudi.

Xa mi janu ya doni ne ka bi hñuhnu, mi tsu ngu ngudminthebe ya ñ'ohō.

<sup>11</sup> Ne ar Hesu bi hñōnga nu'u ya tsi thuhme, bi umba njamōdi Jō, ne bi hyemba yá m̄axte. Nuyu bi umba nu'u mi hudi, ne bi jap'u ya hwō n'ehe, mi t'umba gatho nō'ō mi ne'u.

<sup>12</sup> Nú'mu mi niñō gatho ya jō'i, ar Hesu bi 'bepa yá m̄axte, ne bi 'ñembabi:

—Johu nuya xeni bi bongi ne hinte da m'edi.

<sup>13</sup> Bi go'u ne bi ñu'sa 'ret'amayoho m'ots'e ya xeni thuhme bi bongwabi nu'u xki ñuni.

<sup>14</sup> Nuya ñ'ohō'u mi hyanda nuna dōta nt'udinū bi 'yot'a ar Hesu, bi 'ñeñ'u:

—Xa majōni go gehnu ár m'ehni Jō ma nda e har ximhai.

<sup>15</sup> Ar Hesu mi pōtho mi ne nda zix'u nda 'ñexa ngu yá ndō. Jange nō'ō bi mengi bi ma ba 'buse har t'ohō.

*Ar Hesu mi 'yo har dehe*

*(Mt. 14:22-27; Mr. 6:45-52)*

<sup>16</sup> Nu mi nxui ba kō yá m̄axte, bi ma hár ñōni ar ñhonthē.

<sup>17</sup> Ne bi yut'u ha n'ar motsa ndi ma'u Nkaper-naum. Nú'mu mi 'yo'u har dehe, xki m'exui, har Hesu hinxki zōta habu mi 'bu'u.

18 Ne bi ñ'o n'ar 'yomndöhi, xa mi japi nda mpunsa ar dehe.

19 Nú'mú xki 'yet'u ar motsa ngu yon'atenthebe ya wëni ár yap'u, bi hyant'u ar Hesu mi pap'u mi 'yo har dehe, ndi wat'a har motsa, ne xa bi zu'u.

20 Ha nö'ö bi 'ñembabi'u:

—Yo gi ntsuhu, go geke.

21 Nu'mú nuyü xa bi njohya bi po'sa ar Hesu har motsa, ne dama bi zoñ'u hár ñöni ar dehe.

### *Ya jö'i bi hyonga ar Hesu*

22 Nu ár hyax'öp'u, nuya jö'i xki go 'randi ar dehe, xki hyant'u n'adar motsa mi 'buhnu, ne ka xki manü yá maxte, ha nu ar Hesu hinxki mewi'u.

23 Nu'mú bi zo ma'ra ya motsa xki 'ñe Tiberia, bi zoñ'u get'u habü ar tsi Hmu xki umba njamödi Jö, ne xki 'winga gatho ya jö'i.

24 Nu mi hyanda ya jö'i himi 'buhnu ar Hesu ne yá maxte, bi boxa ha ya motsa, ne bi ma'u Nkapernaum ma ba honi.

### *Ar Hesu, ar thuhme unga ar te*

25 Nu mi dinga ar Hesu mi 'yo 'randi ar dehe, bi 'ñeñ'u:

—Utate, ham'u ga tsokwa.

26 Ar Hesu bi dödi ne bi 'ñembabi'u:

—Xa majöni di xi'ahu, gi hongagihu ngetho da 'ra'ahu ga tsihu ar thuhme ne ga niñöhu, hinge gi honju ngetho ga hyanthu ya döta nt'udi.

27 Yo gi umba ri muihu gi hoñhu ar ñhuni ngut'a da thege. Umba ri muihu gi hyoñhu ar ñhuni unga ar te hiñham'u da göts'i, da 'ra'ahu Nö'ö Togo ba e bi Njö'i, ngetho go xi hñuxa Jö ár Dada da uñ'ö.

28 Nu'mú bi 'ñeñ'u:

—Tema mahyoni ga pehe, ne njap'u ga pehe nö'ö ne Jö ga othe.

<sup>29</sup> Ar Hesu bi dödi ne bi 'ñenö:

—Gehnu ar 'befi ne Jö gi 'yothu, gi ñ'emuihu nö'ö togo xpa peñ'ö.

<sup>30</sup> Bi 'ñeñ'u 'mu:

—Tema nt'udi gi ot'e ga hanthe ne ga ñ'emui'ihe. Tema döta 'befi gi pefi.

<sup>31</sup> Numa palehu bi zi ar thuhme mi ta mahets'i núnu ha ya ot'at'oho, ngu engar har t'ofu: Bi umba ar thuhme ndi 'ñe mhets'i nda zi'u.

<sup>32</sup> Ar Hesu bi 'ñembabi'u:

—Xa majöni di xi'ahu, ar Moise himbi 'ra'ahu ar thuhme ndi 'ñe mhets'i. Ha numa Dada hö, 'ra'ahu ar thuhme majöni di 'ñe mhets'i.

<sup>33</sup> Ngetho ar thuhme unga Jö, gehnu nuna ba kö mhets'i, ne umba ár te ya meximhai.

<sup>34</sup> Nu'u bi 'ñembabi'u:

—Tsi Hmu, 'raje hyax'mu nunar thuhme'ö.

<sup>35</sup> Ne ar Hesu bi 'ñembabi'u:

—Nuga go dar thuhme ungar te. Gatho nu'u togo da e da hyongagi, hiñham'u ma da ntunthu, ha nu'u togo da ñ'emuiigi, hiñham'u ma da ntuthe.

<sup>36</sup> Ngu xta xi'ahu, mödi xka hyandgagihu, hingi ñ'emuihu.

<sup>37</sup> Gatho nu'u togo xi 'raka Jö ma Dada, ma da e da hyongagi. Ha gatho nu'u togo da e da zükagi, hinga kots'i.

<sup>38</sup> Ngetho nuga xta kö mhets'i, hinxta ehe ga ot'a nö'ö di nesega, xta e ga ot'a gatho nö'ö ne togo xpa penkagi.

<sup>39</sup> Gehnu ne ma Dada togo xpa penkagi, gatho nu'u togo xi 'yentk'a ha ma 'ye hinga 'bedi, ne



nuya ngöxapa, ma ga ko'spa yá te hiñham'u da göts'i.

<sup>40</sup> Nö'ö togo xpa penkagi, ne'ö gatho nu'u togo da hñuxka yá da ár T'uigi Jö, ne da ñ'emuigi, pe'sa ar te hiñham'u da göts'i, ne nuga ga ko'spa yá te ha ya ngöxapa.

<sup>41</sup> Nu'mú nuya xodyo mi njont'ane n'a ngu n'a, ngetho xki 'ñeñ'ö: Nuga go dar thuhme xta kö mhets'i.

<sup>42</sup> Ne mi eñ'u:

—Ha hinga gehnu ar Hesu ár t'u ar Huse, di pöthwu togo yá dada. Hanja em'u xpa kö mhets'i.

<sup>43</sup> Ar Hesu bi döti ne bi 'ñembabi'u:

—Yo'ö gi ñöxhnathohu.

<sup>44</sup> Ngetho hinto tsá da e da hyongagi nu'mu hinda zopa ár mfeni Jö ma Dada togo xpa penkagi. Ne nuga ga ko'spa ár te ha ya ngöxapa, ne da me'sa ar te hiñham'u da göts'i.

<sup>45</sup> Njawa xi 'yot'a yá m'ehni Jö har t'ofö: Jö ma da uta gatho ya jö'i. Jange gatho nu'u togo xi 'yoxa nö'ö mönga ma Dada, ne xi zo hár mfeni, da e da hyongagi.

<sup>46</sup> Hingi 'bu n'a togo xi hyanda Jö ar Dada, hönse nö'ö togo xpa pehni. Nö'ö hö, go xi hyanda ar Dada.

<sup>47</sup> Xa majöni di xi'ahu, nu togo ñ'emuigi pe'sa ar te hiñham'u da göts'i.

<sup>48</sup> Nuga go dar thuhme ungar te.

<sup>49</sup> Nuya ri palehu mam'et'o bi zi ar thuhme mi ta mhets'i ha ya ot'at'ohö, ne bi du'u.

<sup>50</sup> Nunar thuhme di xi'ahu, hingi njap'u. Nunu di 'ñe mhets'i, ne gatho nu'u togo da zi, hinda ma da du.

51 Nuga go dar thuhme ungar te xpa e mhets'i. Nö'ö togo da zi nuna thuhmenü, ma da me'sa ar te hiñham'u da göts'i. Nunar thuhme di xi'ahü, gehnü ma ndo'yose ga da, ne njap'u ya meximhai da me'sa ar te hiñham'u da göts'i.

52 Nuya xodyo mi ntsahñöki n'a ngu n'a mi eñ'u:  
—Hanja da tsä da 'rakagihü ga tsafu ár ndo'yosenü.

53 Ar Hesu bi 'ñembabi'u:  
—Xa majöni di xi'ahü, nu'mü hingi tsafu ár ndo'yo ne hingi tsifu ár ji Nö'ö Togo ba e bi Njö'i, hinda nja ri tehü hiñham'u thege.

54 Nö'ö togo tsaka ma ndo'yo ne tsika ma ji, pe'sa ar te hiñham'u da göts'i, ne ga ko'spa ár te hár ngöts'i ar ximhai.

55 Ngetho ma ndo'yo gehnü ar ñhuni majöni, ne ma ji ar ts'ithe majöni. Gehyü unga ar te hiñham'u da göts'i.

56 Nö'ö togo tsaka ma ndo'yo ne tsika ma ji, ma ga 'bu'be'ö.

57 Njangu Jö ar Dada togo ba penkagi hö ar te, nuga di te ngetho di 'bu'bega'ö. Ha nu'u togo da zaka ma ndo'yo, da nte n'ehe ngetho di 'bu'bega'u.

58 Go gehnü ar thuhme di xi'ahü ba kö mhets'i. Nö'ö togo da zi, ma da me'sa ar te hiñham'u da göts'i, hinga njangu ri palehü bi zi ar thuhme mi tä mhets'i, ne bi du'u.

59 Nuya mhöyü bi mönga ar Hesu nú'mü mi uta ya jö'i ha yá nijö'u núnu Nkapernaum.

*Ya mhö ungar te hiñham'u da göts'i*

60 Nzeye nu'u togo mi teni, mi 'yoxa njap'u mi eñ'u:

—Xi ñhembí nŏ'ö teme mö. Togo tsá da 'yot'e.

61 Ar Hesu mi pŏtho tema mi njont'ane, ne bi ñhembabi'ü:

—Hage tsot'a ri muihu nŏ'ö di xi'ahu.

62 Tema gi beñhu nu'mu gi hyanthu Nŏ'ö Togo ba e bi Njö'i, da mengi da boxa mhets'i habu mi 'bu'ö m'et'o.

63 Ar hñö go unga ar te, ha nŏ'ö bi e har ndo'yo hinte fats'i. Nuya mhö xta xi'ahu nonga ar hñö ne unga ar te.

64 Hŏnse, 'ra hingi ñ'emuihu.

Ngetho ar Hesu hár ndui mi pŏtho togo himi ñ'emuiibi, ne togo ma nda da.

65 Ne bi 'ñenö:

—Jange da eñ'ahu, hinto tsá da e da hyongagi nu'mu hinda zo ma Dada.

66 M'efa nzeye nu'u togo mi teni, bi hyep'u ne himi ñ'owi.

67 Jange ar Hesu bi 'ñemba nu'u 'ret'amayoho yá maxte xki hwahni:

—Hage gi ne gi möhu n'ehe.

68 Ar Simu Pedro bi dödi ne bi 'ñenö:

—Tsi Hmu, togo man'a ga teñhe. Hŏnse'i gi mönga ya mhö ungar te hiñham'u da göts'i.

69 Ha nuje xta ñ'emuihe ne xta pöhe go gar Kristo ár T'u'i Jö togo hŏse ar te.

70 Ar Hesu bi dödi:

—Nuga da hwañ'ahu gi 'ret'amayohohu. Mödi njap'u, n'a di hñöx'ahu ar ts'ondöhi.

71 Nŏ'ö mi nonga ar Huda Iskariote ár t'u ar Simu, ngetho go ma nda da'ö, ne mi n'a nu'u 'ret'amayoho yá maxte.

## 7

*Nuyá jödö ar Hesu himi ñ'emui már m'ehni Jö*

<sup>1</sup> M'efa ar Hesu mi 'yo har hai Ngalilea, himi ne nda m'uhnu Nhudea ngetho ya xodyo mi honi nda hyo.

<sup>2</sup> Mi 'bap'utho ár dango ya xodyo nö'ö ár thuhu, ar dango nguxiza.

<sup>3</sup> Nuyá jödö bi 'ñemba ar Hesu:

—Poni di ma Nhudea, ne nu'u togo teñ'a'i da hyanda nuya döta nt'udi gi ot'e.

<sup>4</sup> Ngetho nu'mu n'ar jö'i ne da ñ'udi, hingi ot'a ar 'befi ñ'ontho. Nu'ge gi ot'a nuya döta nt'udiyu, ñ'udi habu gatho da hyant'a'i.

<sup>5</sup> Mi mönga njap'u ngetho mödi ma yá jödö, himi ñ'emui'u xki 'ñexa Jö.

<sup>6</sup> Nu'mú ar Hesu bi 'ñembabi'u:

—Hingi tsada ga manu, ha nu'ahu tsada ham'u gi ne gi möhu.

<sup>7</sup> Nuya jö'i hingi tsá da utsa'ihu, ha nuga hö utsagi, ngetho di xipa yá ts'o'befi pe'u.

<sup>8</sup> Di möhu ar dango. Nuga hingi tsada ga ma.

<sup>9</sup> Hõnse bi xipabi njap'u, ne bi gohnu Ngalilea.

*Ar Hesu bi ma ar dango nguxiza*

<sup>10</sup> Nu mi wadi bi ma yá jödö, ar Hesu bi ma har dango n'ehe, mödi bi ma ngu ñ'ontho, himi ñ'udi.

<sup>11</sup> Nuya ndöxodyo mi hongá har dango, ne mi eñ'u:

—Habu bi 'yo'ö 'mu.

<sup>12</sup> Ne nzeýe nuya mi 'buhnu mi nõnga ar Hesu, 'ra mi enö: Nunu ar hogajö'i, ne ma'ra mi enö: Hingar hogajö'i, ngetho ka ya jö'i.

13 Txi 'ramtx'u mi ñö'u, ngetho mi tsu nuya ndöxodyo.

14 Xki tho ngu made ar dango, mi yut'a ar Hesu har dönganijö ne mi uta ya jö'i.

15 Nuya ndöxodyo xa mi 'yotho ne mi eñ'u:

—Hanja pe'sa nzeye ar mfödinu, hiñhabu xi ma xpa t'uti.

16 Ar Hesu bi dötwabi'u ne bi 'ñenö:

—Nö'ö te di udi hingo di mönsega, go ár meti togo xpa penkagi.

17 Nu'u togo ne da 'yot'a nö'ö ne Jö, da bö'u di utwa ár mhö Jö, hinge nö'ö di bensega.

18 Nö'ö togo bense nö'ö mö, hönse ne da t'e'spa ár nsu. Ha nö'ö togo ne da t'e'spa ár nsu togo xpa peñni, ge'ö mönga majöni ne hingar kate.

19 Ar Moise bi 'ra'ahu ar t'ofö. Hinto xka 'yothu ngu mönga har t'ofonu. Yo'ö gi ne gi hyogagihu 'mu.

20 Nuya jö'i xki mhunts'i bi dödi ne bi 'ñeñ'u:

—Gi pe'sa ar ts'ondöhi. Togo ne da hyo'a'i.

21 Ar Hesu bi dödi ne bi 'ñembabi'u:

—Hönse n'ar 'befi da ot'e, ne xa gi 'yohu.

22 Ar Moise bi 'ra'ahu ar nsegi gi huxu ha ri ndo'yohu, mödi hingo mar meti'ö, már meti ya pale. Ha nu'ahu gi huxu ar nsegi mödi ar pa ntsaya.

23 Nú'mu gi hu'sfu ar nsegi ri bötsihu, mödi ar pa ntsaya, hingi nehu gi ts'okwabihu ár t'ofö ar Moise. Xi'mu hanja gi mbo ri kwehu ngetho da othebi gatho ár ndo'yo n'ar ñ'ohö har pa ntsaya.

24 Beñhu xiñho hanja gi nthentehu, wa njap'u wa hin'ö. Yo ma gi nthentehu hönse gi hanthu nö'ö oxa mañö.

*Nuya jö'i mi enö: Ha go gehnu ar Kristo*

<sup>25</sup> 'Ra ya me Herusalen mi eñ'u:

—Ha hinga gehnu togo thoni da tho.

<sup>26</sup> Hyanthu 'bahnu madeda ya jö'i uti, ne hinte nsipabi. Hage xi ñ'emui ma ndöhu go gehnu ar Kristo 'mu.

<sup>27</sup> Ngetho di pöhu habu xpa ehnu, ha nu xta e ar Kristo, hinto ma da bödi habu di 'ñehe.

<sup>28</sup> Nú'mu mi 'yo njap'u ar Hesu, mi 'bahnu mi uta ya jö'i har dönganijö, bi ñö nts'edi ne bi 'ñenö:

—Gi pökagihu ne gi pöhu habu dar mengu. Ha hinxta esega, xpa penkagi nö'ö togo majöni, ne nu'ahu hingi pöhu togo'ö.

<sup>29</sup> Nuga hö di pödi, ngetho ka xta ehnu, ne ba penkagi ga ehe.

<sup>30</sup> Nuya ndöxodyo mi 'yoxa njap'u, xa mi ne nda guhmö'u. Ne hinte bi japabi, ngetho hinxki zota ár pa.

<sup>31</sup> Ha nzeje ya jö'i mi 'buhnu bi ñ'emui, ne mi eñ'u:

—Xi nu xta e ar Kristo, hage ma da döhö da 'yot'a ya nt'udi ngu nuya xi 'yotnu 'mu.

*Ya denga'bepate bi mehna togo nda guhmö ar Hesu*

<sup>32</sup> Nuya denga'bepate mi bödi mi nonga ar Hesu ya jö'i, nuyu ne ya ndömöjö bi meñ'u ya nsunijö ma nda guhmö.

<sup>33</sup> Jange ar Hesu bi 'ñenö:

—Honse ma'ra ya tsi pa ga 'buhwihu, ne ga penga habu bi 'bu togo ba penkagi.

<sup>34</sup> Ma gi hyongagihu ne hingi tingagihu. Nu habu gar maga, hinda tsä gi möhu.

<sup>35</sup> Nu'mú, nuya ndöxodyo mi 'buhnu mi engu n'a ngu n'a'u:

—Habü di manu 'mu, enö hinda tsä ga tiñhu. Hage ma da zu nu'u xi mfont'a ha yá hai nu'u hingya xodyo, ne da ut'u.

<sup>36</sup> Tema di bongu nö'ö bi 'ñenö: Ma gi hyongagihu ne hingi tingagihu, ne nu habu gar maga, hinda tsä gi möhu.

*Ngu n'ar döthe ar dehe unga ar te*

<sup>37</sup> Nö'ö ar pa mar nsu ár ngöts'i ar dango, ar Hesu bi m'ai ne bi ñö nts'edi bi 'ñenö:

—Nu'mu ja togo tsu ar duthe, da e da hyongagi da ntsithe.

<sup>38</sup> Nö'ö togo ñ'emuigi, ma da bongu hár mu ngu ya döthe ar dehe unga ar te, ngu mönga har T'ofu.

<sup>39</sup> Ar Hesu mi nõnga ár Hñö Jö, nö'ö ma nda hñõnga nu'u togo nda ñ'emuibi'ö. Ha nunár Hñö Jö hinxki etho, ngetho ar Hesu hinxki mengda hár nsunda mhets'i.

*Ya jö'i bi ñhege*

<sup>40</sup> Nu mi 'yoxa njap'u ya jö'i, 'ra mi eñ'u:

—Xa majöni gehnu ár m'ehni Jö.

<sup>41</sup> Ma'ra mi enö:

—Gehnu ar Kristo.

Ha ma'ra mi eñ'u:

—Hage di 'ñe Ngalilea ar Kristo 'mu.

<sup>42</sup> Hin'ö, ngetho har T'ofu enö, ar Kristo ma nda e ha yá 'beto ar Dabi mar mengu Belen.

<sup>43</sup> Mi n'añ'o n'a ngu n'a yá mfeni mi nõnga ar Hesu, jange ya jö'i bi ñhege.

<sup>44</sup> 'Ra mi ne nda gumhö, ne hinte bi japabi.

*Nuya ñ'ohoyu mi eñ'u: Hinto man'a xi ñö njanu*

<sup>45</sup> Nu'u togo xki m'ehni nda guhmö ar Hesu, bi mengi ma ba k'ö'sa ya ndömöjö ne ya denga'be<sup>u</sup>pate. Ne nuya ndöy<sup>u</sup> bi 'ñeñ'u:

—Yo'ö hinga tsih<sup>u</sup>.

<sup>46</sup> Nu'u xki 'behni bi dödi:

—Hinda tsihe, ngetho da ohe nö'ö bi mö, ngu hinto man'a xi mönga njap'u.

<sup>47</sup> Nu'm<sup>u</sup> nuya denga'be<sup>u</sup>pate bi döti ne bi 'ñembabi'u:

—Hage xi ka'ah<sup>u</sup> n'ehe.

<sup>48</sup> Gi pöhu xiñho, hinjo'o n'ar ndömöjö, wa n'ar denga'be<sup>u</sup>pate xi ñ'em<sup>u</sup>i.

<sup>49</sup> Nu'u togo xi ñ'em<sup>u</sup>i, gehy<sup>u</sup> nu'u hingi pö ar t'of<sup>o</sup>, ne xi theke da m'edi.

<sup>50</sup> Ar Nikodemo, nö'ö togo xki ma nxui ma ba k'önga ar Hesu, mar denga'be<sup>u</sup>pate n'ehe, bi 'ñemba nu'u mi 'buh<sup>u</sup>:

<sup>51</sup> —Gi pöhu numa t'ofoh<sup>u</sup>, hingi ho<sup>x</sup>a ár ts'oki n'ar jö'i nu'm<sup>u</sup> hinxi 'yots'e m'et'o, ne xi bödi teme xi 'yot'e.

<sup>52</sup> Nuya ndömöjö ne yá mi denga'be<sup>u</sup>patewi bi 'ñembabi:

—Hage gar me Ngalilea n'ehe. Hñet'a xiñho ar T'of<sup>o</sup>, ne gi pödi hinxpa eh<sup>u</sup> Ngalilea n'ár m'ehni Jö.

<sup>53</sup> Mi wa ar dango, n'a ngu n'a bi menga yá ngu.

## 8

### *Ar zinganthöti 'behñö*

<sup>1</sup> Ha nu ar Hesu bi ma har t'oh<sup>o</sup> Njömdöni.

<sup>2</sup> Nu ár hyax'ö n'itho, ba penga man'agi har dönganijö, ne bi wat'a ra nze<sup>y</sup>e ya jö'i, bi hñuh<sup>u</sup> bi uti.



<sup>3</sup> N'a mba ep'ũtho ya böt'ofoto ne ya denga'bepeate, mi tsimpa n'ar 'behñö xki ts'udi mi 'bengwi n'ar ñ'ohö himár döme. Bi m'a'ama madetho,

<sup>4</sup> ne bi 'ñembabi'ũ:

—Utate, nunar 'behñönu xi ts'udi mi 'bengwi n'ar ñ'ohö himár döme.

<sup>5</sup> Ar Moise 'bepkagihũ há r t'ofoto ga hohũ nk'ahni nuya 'behñö njanũ. Wa te gi mönge.

<sup>6</sup> Nu'ũ bi mönga njap'ũ mi honi nda hyathmö, mi ne nda dimbabi teme nda hyots'e. Ha nunar Hesu bi ñ'ani, bi ja ár 'ye mi ot'a har hai.

<sup>7</sup> Ha nu'ũ himi tsaya mi ambabi. Nu'mú ar Hesu bi m'ai ne bi 'ñembabi'ũ:

—Nö'ö togo hinte ma ts'oki tu, dá du'mi da unga ar nk'ahni.

<sup>8</sup> Ne bi mengi bi ñ'ani mi ot'a har hai man'agi.

<sup>9</sup> Nu mi 'yo njap'ũ, ba e ha yá mfenise nuyá ts'oki xki 'yot'ũ, ne 'raman'a bi boni bi ma'ũ, m'et'o bi bongu nu'ũ ya dönzia, m'efa nu ma'ra mi bötsitho. Hönse bi gohnũ ar 'behñö mi 'ba made, ne ar Hesu.

<sup>10</sup> Mi mengi bi m'a ar Hesu, hinto bi hyandi, hönse ar 'behñö mi 'bahnu, ne bi 'ñembabi:

—Habũima nu'ũ togo mi hox'a'i. Hage hinto bi ne bi k'añ'a'i.

<sup>11</sup> Bi 'ñeñ'ö:

—Hinjo'o, tsi Tata.

Nu'mú ar Hesu bi 'ñembabi:

—Nuga n'e, hinte di hox'a'i. Di ma, ne yo ma gi pengi gi 'yot'a ar ts'oki.

*Ar Hesu gehnu ár ñot'i ya meximhai*

<sup>12</sup> Ar Hesu bi mengi bi zo ya jö'i ne bi 'ñembabi'ũ:

—Nuga go dar ñot'iga di yot'wa ya meximhai. Nö'ö togo da dengagi, hinda ma da ñ'o har 'bexui, ngetho da yot'wabi ar ñot'i unga ar te.

<sup>13</sup> Nu'mú nuya denga'bepate bi 'ñembabi'ö:

—Gi mönse togo'i, jange hinga majöni nö'ö gi mö.

<sup>14</sup> Ar Hesu bi dödi ne bi 'ñembabi'u:

—Mödi di mönse togogi, majöni nuna di mö, ngetho nuga di pödi habu xta ehe ne habu gar ma. Nu'ahu hingi pohu habu xta ehe wa habu gar ma.

<sup>15</sup> Nu'ahu gi höxu majöni ngu ri mfenisehu, ha nuga hinto di hö'spa majöni.

<sup>16</sup> Ha nu'mu togo di hö'spa majöni, nö'ö di mö majöni 'mu, ngetho hindi höxase, di höx'be ma Dada togo xpa penkagi.

<sup>17</sup> Nu ha ri t'ofohu enö: Nu'mu yoho ya jö'i n'at'wu mö, majöni.

<sup>18</sup> Nuga di damajöni togogi, ma Dada togo ba penkagi damajöni togogi n'ehe.

<sup>19</sup> Bi 'yambabi'u:

—Habu bi 'bu ri Dada.

Ar Hesu bi dödi ne bi 'ñenö:

—Hingi pökagihu, ne hingi pohu ma Dada. Nu'mu gi pökagihuhmö, gi pöhmöhu togo ma Dada n'ehe.

<sup>20</sup> Ar Hesu bi mönga njap'u nú'mu mi uta ya jö'i núnu habu mi 'bu ar m'esbojö har dönganijö. Ne hinto bi tsä bi gu, ngetho hinxki zota ar pa nda jwata ar 'befi.

*Habu gar maga, nu'ahu hinda tsä gi möhu*

<sup>21</sup> Ar Hesu bi mengi bi 'ñembabi'u:

—Ma ga maga, ne nu'ahu gi hyongagihuhmö. Ha ma gi tuwi ri ts'okihu, ne hinda tsä gi möhu habu gar maga.

22 Nuya ndöxodyo mi ense'u:

—Hage ma da ñhose 'mụ. Hanja enö: Habu gar maga, hinda tsə gi möhü.

23 Nep'u ar Hesu bi 'ñembabi'u:

—Nu'ahü ja gar menguhüwa, ha nuga xta e mañö mhets'i. Nu'ahü ár meti'ihü ar ximhai, ha nuga hingo ár metigi.

24 Jange da xi'ahü ma gi tuwi ri ts'okihü, ngetho nu'mü hingi ñ'emüihü go geke, ma gi tuhü gi tuxta ri ts'okihü.

25 Nep'u nu'u bi 'ñembabi'ö:

—Xi'ge togo'i 'mụ.

Ar Hesu bi dödi ne bi 'ñembabi'u:

—Get'ö ngu da xi'ahü har ndui.

26 Nuga mödi di pe'sa ma'ra teme ga xi'ahü, ne ga hös'a majöni ri m'üihü, honse di xi'ahü nö'ö xi xikagi togo xpa penkagi. Gehnü di mönga har ximhai, ne majöni nö'ö möñ'ö.

27 Ha nu'u togo mi ots'e, himbi bö'u mi nonga Jö ár Dada.

28 Jange ar Hesu bi 'ñembabi'u:

—Nú'mü xki tsuthü Nö'ö Togo ba e bi Njö'i gi hyohü, ma gi pöhü 'mụ togo xa majöni go geke. Ne gi pöhü n'ehe hinte di ot'ase. Nö'ö ba utka ma Dada, gehnü di xi'ahü.

29 Numa Dada togo ba penkagi hinxi hyegase, hyax'mü di 'bu'be, ngetho nuga di ot'a nö'ö nu-mañho'ö.

30 Nú'mü mi mönga njap'u ar Hesu, nzeye ya jö'i bi ñ'emüi.

*Nö'ö majöni xi xogagihü xki gogagihü ar ts'oki*

31 Ar Hesu bi 'ñemba nu'u ya xodyo xki ñ'emüi:

—Nu'mu gi 'ñet'a xiñho ri muihu ma mhö, xa majöni ma ñ'owi'ihu 'mu.

<sup>32</sup> Ne ma gi pöhu nö'ö majöni, ha nu'mu gi pöhu nö'ö majöni, gehnu da xok'ahu.

<sup>33</sup> Nu'u bi dödi ne bi 'ñembabi:

—Nuje yá 'betogihe ar Abra. Hiñham'u xi jokagihe ngu togo yá metigihe. Hanja gi enö da sogagihe.

<sup>34</sup> Ar Hesu bi dödi ne bi 'ñenö:

—Xa majöni di xi'ahu, nö'ö togo ot'a ar ts'oki, nunu xi got'atho ar ts'oki.

<sup>35</sup> Nu'u togo m'egotho, hinda ma da go har ngu gatho ya pa. Ha nu ar t'u hö, da gohnu.

<sup>36</sup> Njap'utho n'ehe, nu'mu ár T'u Jö da guk'ahu har ts'oki, majöni xka poñhu, ne hinte ko'ahu.

<sup>37</sup> Di pödi yá 'betoi'ihu ar Abra. Mödi njap'u gi ne gi hyogagihu, ngetho gi tsamañ'uhu nö'ö di xi'ahu.

<sup>38</sup> Nuga di mönga nö'ö xi utkagi ma Dada, ha nu'ahu gi othu nö'ö xi mönga ri dadahu.

<sup>39</sup> Nu'u bi dödi ne bi 'ñembabi:

—Ma palehe ar Abra.

Ar Hesu bi 'ñembabi'u:

—Nu'mu yá 'betoi'ihu ar Abra, gi tembahmöhu ár 'befi'ö 'mu.

<sup>40</sup> Ha nu'ahu mödi xta xi'ahu nö'ö majöni xi xika Jö, gi ne gi hyogagihu. Ar Abra himbi 'yot'a njap'u.

<sup>41</sup> Nu'ahu gi othu ngu ot'a ri dadahu.

Nu'mu nu'u bi 'ñemba ar Hesu:

—Nuje hinge togatho di emfe ma dadahe. Hönse n'a ma Dada di 'ñehe, gehnu Jö.

<sup>42</sup> Nu'mu ar Hesu bi 'ñembabi'u:

—Nu'mu ri Dadahumö Jö, gi mökagihu, ngetho xta e habu bi 'bu'ö. Hinda ese, go ba penkagi.

43 Hanja hingi tso ri mfenihu nö'ö di xi'ahu. Hingi tso, ngetho xi njot'a ri muihu.

44 Ar ts'ondöhi go ri dadahu'ö, ne gi ne gi 'yothwu nö'ö ne'ö. Hár nduitho mar hyote ne ar hyate, hiñham'u mönga nö'ö majöni. Nú'mu mönga ya nhemñö, go bense, ngetho ar nemñö, ne go bi du'ma ar nhemñö'ö.

45 Nu'ahu hingi ñ'emugihu, ngetho di mönga nö'ö majöni.

46 Hinjo'ö togo da tsa te gi hyoxkagihu n'ar ts'oki. Nu'mu di mönga nö'ö majöni, yo'ö hingi ñ'emugihu.

47 Nu'u togo yá meṭi Jö, otwa ár mhö. Hingi ne gi 'yo'spabihu, ngetho hingo yá meṭi'ihu'ö.

*Nú'mu hinxki m'uta ar Abra, nunar Hesu mi bu'ö*

48 Nep'u nuya xodyo bi dödi ne bi 'ñembabi:

—Hage hinge majöni nö'ö di xi'ahe, gar me Nsamaria ne xka nthexkwi n'ar ts'ondöhi.

49 Ar Hesu bi dödi ne bi 'ñenö:

—Hindi nthex'bega n'ar ts'ondöhi. Nuga di numansu ma Dada, ha nu'ahu hingi numansugihu.

50 Nuga hindi mönga njap'u di honi gi 'ñeskagihu ma nsu. Ngetho 'bu n'a togo eskagi, ne go ma da hñöxmajöni'ö.

51 Xa majöni di xi'ahu, nö'ö togo ot'a nö'ö di mö, hiñham'u da du.

52 Nu'mú ya xodyo bi 'ñembabi:

—Nupya hö, di pöhe gi nthexkwi n'ar ts'ondöhi. Ngetho ar Abra bi du, nuyá m'ehni Jö bi du'u n'ehe. Hanja gi enö, nö'ö togo da 'yot'a nö'ö gi mö, hiñham'u da du.

<sup>53</sup> Hage ri nsu töpa ár nsu ar Abra 'mu. Ngetho bi du'ö ne yá m'ehni Jö bi du'u n'ehe. Tema nsu gi beni gi pe'ske 'mu.

<sup>54</sup> Ha nu ar Hesu bi dödi ne bi 'ñenö:

—Nu'mu ga exase ma nsu, pontho hinter me'ö. Numa Dada go eska ma nsu, nö'ö togo gi emfu ri Jöhu.

<sup>55</sup> Ha nu'ahu hingi pöhu togo'ö. Nuga hö di pödi. Nu'mu ga enö hindi pödi, gar nemhñöhmö ngu'ahu, ngetho di pödi ne di otwa ár mhö.

<sup>56</sup> Ri palehu ar Abra xa mi johya, mi to'ma nda zonga ar pa nga 'bukwa har ximhai, ne bi njohya bi hyandi.

<sup>57</sup> Nuya xodyo bi 'ñembabi'ö:

—Hinxka jwata madenthebe njeje. Hanja tsa xka hyanda ar Abra.

<sup>58</sup> Ar Hesu bi 'ñembabi'u:

—Xa majöni di xi'ahu, ndi 'buka mam'et'o nú'mu hinxki m'uta ar Abra.

<sup>59</sup> Jange nu'u bi guxya do nda k'ahmö. Ha nunar Hesu bi ñ'öni, bi bonga har nijö bi thota madetho bi ma.

## 9

*Ar Hesu bi xokwa yá da n'ar ñ'ohö xki m'ui himi handi*

<sup>1</sup> Nu mi panu ar Hesu, bi hyandi mi 'buhnu n'ar ñ'ohö xki m'ui mi goda.

<sup>2</sup> Nuyá maxte bi 'yambabi'ö ne bi 'ñeñ'u:

—Utate, togo bi 'yot'a ar ts'oki ne bi m'ui goda, gesenu wa yá dada.

<sup>3</sup> Ar Hesu bi dödi ne bi 'ñenö:

—Hingo ár ts'okinu, ne hingo ár ts'oki yá dada n'ehe. Ngetho njanu nda nheki ár döta 'befi Jö hár te'ö.

<sup>4</sup> Núpya mpa, mahyoni ga pepa ár 'befi nö'ö togo ba penkagi. Ba ep'u ar xui nú'mu hinto tsa da mpefi.

<sup>5</sup> Núpya di 'bukwa har ximhai, go dar ñot'iga di yot'wa ya meximhai.

<sup>6</sup> Mi wadi bi mönga njap'u, bi ntsojni har hai, bi 'ñöt'a ar bohai. Ne bi go'spa ha yá da ar ñ'ohö mi goda.

<sup>7</sup> Ne bi 'ñembabi:

—Di ma ba peka ri da har pothe Siloe (nunar thuhu'ö poni da 'ñenö, xi m'ehni).

Bi ma'ö ma ba peka ár da, ne mba pengi mi tsa nda hyandi.

<sup>8</sup> Nu'mu nuyá n'angu ne nuya jö'i xki hyandi mi goda, mi eñ'u:

—Hage hinga gehnu togo mi hudi mi peti.

<sup>9</sup> 'Ra mi enö mi ge'ö, ma'ra mi enö ndi hñöts'i. Nö'ö mi ense:

—Go geke.

<sup>10</sup> Ne bi t'embabi:

—Hanja xi xo ri da.

<sup>11</sup> Nö'ö bi dödi ne bi 'ñenö:

—Nu ar ñ'ohö ár thuhu ar Hesu, bi 'ñöt'a ar bohai, bi goska ma da, ne bi 'ñengagi: Di ma har pothe Siloe ba peka ri da. Nuga da ma da peke, ne bi tsa da handi.

<sup>12</sup> Nu'u bi 'yambabi:

—Habü bi 'bu'ö.

Bi dö'ö ne bi 'ñenö:

—Hindi pödi.

*Ya denga'bepate bi hñö'spa majöni ar ñ'ohö mi godahmö*

<sup>13</sup> Ya jö'i bi zi'spa ya denga'bepate nö'ö mar godahmö.

<sup>14</sup> Ha nö'ö ar pa xki 'ñöt'a ar bohaj ar Hesu, ne xki xokwa ár da ar ñ'ohö mi goda, mar pa ntsaya.

<sup>15</sup> Nuya denga'bepate bi 'yambabi n'ehe hanja xki dixa ár da. Nö'ö bi dödi ne bi 'ñenö:

—Bi goska ar bohaj ha ma da, da ma da peke, ne bi za da handi.

<sup>16</sup> 'Ra ya denga'bepate mi eñ'u:

—Nunar ñ'ohönü hinxpa pehna Jö, ngetho hingi japamasu ar pa ntsaya.

Ha ma'ra mi enö:

—Nu'mü n'ar 'yot'ats'okihmö, hage da tsa da 'yot'a nuya döta nt'udiyü.

Ne njap'u bi ñhe'u.

<sup>17</sup> Nep'u bi mengi bi t'embabi ar ñ'ohö mi godahmö:

—Xi'ge, tema gi enge togo bi xok'a ri da.

Nö'ö bi dödi ne bi 'ñenö:

—Gehnü n'ár m'ehni Jö.

<sup>18</sup> Ha nuya ndöxodyo himi ñ'emüi mar goda ne xki xo yá da, jange bi zompabi ár dada ne ár nönö.

<sup>19</sup> Ne bi ñ'añ'u:

—Hage go gehnü ri t'uñu gi eññu bi m'ui mi goda. Xi'mü, hanja hantya.

<sup>20</sup> Nuyá dada bi 'ñeñ'u:

—Di pöhe xiñho, go gehnü ma t'uñe bi m'ui mi goda.

<sup>21</sup> Nuje hindi pöhe hanja hantya, wa togo bi xokwabi ár da. Pe'sa yá jeye, 'yambabihu'ö, tsa da döse.



<sup>22</sup> Bi mönga njap'u yá dada, ngetho mi tsu ya ndöxodyo, hinge nda hyegi nda yut'a ha yá nijö'u. Ngetho nuya ndö xki 'yot'a n'ar nkohi'u, mi enö, nö'ö togo nda 'ñemba ar Hesu mar Mesia, mi to'mi nda t'enga har nijö.

<sup>23</sup> Jange bi 'ñenga yá dada: Pe'sa yá jeye, 'yambasehu'ö.

<sup>24</sup> Nu'mú bi mengi bi ts'ohna nunar ñ'ohö mar godahmö ne bi t'embabi:

—Umba njamödi Jö. Di pöhe xiñho, nunar ñ'ohö togo bi xok'a ri da, n'ar 'yot'ats'oki.

<sup>25</sup> Nö'ö bi dödi ne bi 'ñenö:

—Hindi pöka hage ar 'yot'ats'oki wa hin'ö. Hönse di pöka ndar goda, ha nupya di handi.

<sup>26</sup> Bi mengi bi t'ambabi man'agi:

—Tema bi ja'a'i. Hanja bi xok'a ri da.

<sup>27</sup> Nö'ö bi dödi ne bi 'ñembabi'u:

—Xta xi'ahu, mödi hinxka ne xka 'yoxu. Yo'ö gi ne gi 'yohu man'agi. Ha gi ne gi teñhu n'ehe.

<sup>28</sup> Nu'u bi zani ne bi 'ñembabi:

—Nu'ge go gi tenge. Di tenje ar Moise.

<sup>29</sup> Di pöhe Jö bi zo ar Moise, ha nunar ñ'ohönu hindi pöhe habu xpa ehe.

<sup>30</sup> Nunar ñ'ohö mar godahmö bi dödi ne bi 'ñenö:

—Tengu'ö, nu'ahu hingi pöhu habu xpa ehe, ha nuga bi xoga ma da.

<sup>31</sup> Di pöhu xiñho, Jö hingi oxa ya 'yot'ats'oki. Ha nu'u togo tsupi ne ot'a ngu ne'ö, hö ots'e.

<sup>32</sup> Hiñham'u xta ohu n'a togo xi xokwa yá da n'a xi m'u goda.

<sup>33</sup> Nu'mu hinxpa pehna Jö nunar ñ'ohönu, hinte xi tsahmö xi 'yot'a nö'ö xi 'yot'mu.

<sup>34</sup> Ha nu'u bi dödi ne bi 'ñembabi:

—Nu'ge ga m'uḥwi ar ts'oki. Tema da za gi utkagihe.

Ne bi 'yeñ'u har nijö.

*Mi jotyá da nu'u mi humamui mi 'bui xiñho*

<sup>35</sup> Ar Hesu bi 'yode xki t'enga har nijö nö'ö mar godaḥmö. Bi ma ba honi, ne nu mi dini bi 'ñembabi:

—Ha gi ñ'emui bi ár T'u Jö.

<sup>36</sup> Nö'ö bi dödi ne bi 'ñenö:

—Ndada, togo'ö ne ga ñ'emui bi.

<sup>37</sup> Ne bi 'ñenga ar Hesu:

—Xka hyandi. Nö'ö togo gi ñöwipya go ge'ö.

<sup>38</sup> Nö'ö mar godaḥmö bi 'ñenö:

—Tsi Hmu, di ñ'emui'i.

Ne bi ndandihmö bi nsunda.

<sup>39</sup> Ar Hesu bi 'ñenö:

—Nuga xta ekwa har ximḥai ga ot'a ar ts'ut'wi. Njap'u nu'u goda da xo yá da, ha nu'u xo yá da da ngoda.

<sup>40</sup> Nu'mú 'ra ya denga'beḥate mi 'buhnu, bi 'yo nö'ö bi möñ'ö ne bi 'ñembabi:

—Xi nuje, hage dar godahe n'ehe.

<sup>41</sup> Ar Hesu bi 'ñembabi'u:

—Nu'mu gar godaḥuḥmö, hinte ma ts'oki gi tuhu. Ngetho gi eñhu gi hanthu, jange gi tuda ri ts'okihu.

## 10

*Ár 'bede ar ma'yo*

<sup>1</sup> Xa majöni di xi'ahu, nö'ö togo hingi kut'a hár goxthi ár nguñ'o ya deti, ne poxta har jödo, n'ar bë ne ar dakate.

<sup>2</sup> Ha nö'ö togo kut'a har goxthi, gehnu ar ma'yo.

<sup>3</sup> Ar sugoxthi xokwabi, ne ya deti pötwa ár mhö ar ma'yo. Ne nunu da zopa yá thuhu n'a ngu n'a, ne da guki.

<sup>4</sup> Nu xta bonga nthi gatho yá meti, da m'et'o ar ma'yo, ne nuya deti teni, ngetho pötwa ár mhö.

<sup>5</sup> Ne nuyá deti hingi tenga ya n'añ'o ma'yo, da nixt'i ngetho hingi pö ya n'añ'o mhö.

<sup>6</sup> Nunar 'bedenu bi xipabi'u ar Hesu, mödi himbi bö'u teme mi ne nda xipabi.

*Ar Hesu ar hoga ma'yo*

<sup>7</sup> Jange ar Hesu bi mengi bi xipabi'u:

—Xa majöni di xi'ahu, nuga go dar goxthigi habu kut'a ya deti.

<sup>8</sup> Gatho nu'u togo xi zo m'et'o, nú'mu hinge ndi tsotka, ma ya bë ne ya dakate, ne nuya deti himbi 'yote.

<sup>9</sup> Nuga go dar goxthi. Nö'ö togo da yut'a har goxthi'ö da mpoho, di kut'i ne di poni, ne xta boni da dinga te da zi.

<sup>10</sup> N'ar bë honse bi ehe da mpë, da ñhote ne da hwati. Ha nuga xta ehe ga unga ar te, hinge n'ar tetho, n'ar hoga te hiñham'u da göts'i.

<sup>11</sup> Nuga go dar hoga ma'yo. Ar hoga ma'yo ent'a ár te da ñonga yá deti.

<sup>12</sup> Ha nö'ö togo m'egotho ne hingar ma'yo'ö, hingo yá meti ya deti, xta hyandi da e ar miñ'o, da nixt'i da zop'u ya deti. Ha nunar miñ'o da font'i habu gatho da ma.

<sup>13</sup> Njap'u nö'ö togo m'egotho, da nixt'i da ma, ngetho ger 'bego hingi tupa ár mu'i te da ja ya deti.

<sup>14</sup> Nuga go dar hoga ma'yo, ne di pödi togo ma deti, ne numa deti pökagi n'ehe.

15 Jangutho ar Dada pökagi, ne nuga di pöka'ö, ne di ent'a ma te ga ñönga ma deti.

16 Ne 'bu ma'ra ma deti nu'u hingya mengu nunar nguñ'onu. Nu'u n'ehe ma ga tsihi, ma da 'yo ma mhö. N'adar mhunts'i ma da nja, ne n'adar ma'yo.

17 Jö ar Dada xa mökagi ngetho di unga ma te, ne ga pengi ga hönga man'agi.

18 Hinto da hñömgä ma te, nuga go di unse. Di pe'sa ar ts'edi ga uni, ne di pe'sa ar ts'edi ga hönga man'agi. Njap'u bi 'bepkagi ma Dada.

19 Nuya xodyo bi mengi bi ñöxhnatho ngetho bi 'yoxa nö'ö bi mönga ar Hesu.

20 Nzeye mi eñ'u:

—Nthexkwi n'ar ts'ondöhi ne xi 'be ár mfeni. Yo'ö gi japamasuhu gi oxu.

21 Ha ma'ra mi enö:

—Nuya te mö, hinda tsä da mönga n'a togo di nthexkwi n'ar ts'ondöhi. Ha n'ar ts'ondöhi hinda tsä da xokwa yá da ya godä.

### *Nuyá ndö ya xodyo bi utsa ar tsi Hmu Hesu*

22 Núnu Herusalen mi tat'a n'ar dango mfeni, mi fenga ar pa xki mengi xki n'a'yo man'agi ar nijö, ne nuya pa'u mar ntse.

23 Ha nu ar Hesu mi 'yonu hár m'et'e ar dönganijö, t'embabi ár m'et'e ar Salomon.

24 Nuya ndöxodyo xa bi got'atho ne bi 'ñembabi:

—Ham'u ma gi hyegagihe gi jaje di yomihe. Nu'mu xa majöni go gar Kristo, xikagihe n'agitho.

25 Ar Hesu bi dödi:

—Xta xi'ahū, ne hingi ne gi ñ'emūihū. Nuya 'befi di pefi di pōta ma Dada, ka nhekip'u togogi, ngu xta xi'ahū.

<sup>26</sup> Ne ngu xta xi'ahū, nu'ahū hingi ñ'emūigihū, ngetho hingo ma deti'ihū.

<sup>27</sup> Nuya ma deti oxa ma mhö. Di pōka'u, ha nu'u tengagi.

<sup>28</sup> Ne di umba ar te hiñham'u da göts'i, hiñham'u ma da m'edi, ne hinto tsā da zimga ha ma 'ye.

<sup>29</sup> Numa Dada togo bi 'rakagi, xa döta ár ts'edi, ne hinto tsā da zimba hár 'ye'ö.

<sup>30</sup> Nuga ne ma Dada di n'atho'be.

<sup>31</sup> Mi 'yoxa njap'u ya ndöxodyo, bi mengi bi guxya do, mi ne nda hyoxya nk'ahni.

<sup>32</sup> Nu'mú ar Hesu bi 'ñembabi'u:

—Nzeye ya hoga 'befi xta ot'e bi pēhna ma Dada. Tema 'befi'ö hingi hanthū xiñho, ngetho gi ne gi k'ankagihū.

<sup>33</sup> Nu'u bi dödi ne bi 'ñenö:

—Hindi ne ga k'añ'ahe ngetho gi ot'a ya hoga 'befi. Di ne ga othe ngetho gi hōkwa ár nsu Jö. Gar jö'i nguje, ne gi ñhuxkwi Jö.

<sup>34</sup> Ar Hesu bi dōtwabi'u:

—Ha hingi enga njawa ha ri t'ofohū: Nuga da enö: Nu'ahū gar jöhu.

<sup>35</sup> Nu'mu bi hñu'spabi ya jö nu'u togo bi umba ár mhö, ha nunar T'ofö bi zoju Jö hinto tsā da 'ñenö hinga majöni,

<sup>36</sup> nuga togo xpa entk'agi ne xpa penkagi Jö ar Dada, hanja gi engagihū di hōkwa ár nsu, honse da mönga ár T'ugi Jö.

<sup>37</sup> Nu'mu hindi ot'wa ár 'befi ma Dada, yo gi ñ'emūigihū.

<sup>38</sup> Ha nu'mu di ot'wabi, mödi hingi ñ'emui<sub>u</sub>gi<sub>h</sub>u, ñ'emui<sub>h</sub>u nuya 'befi di ot'e, ne njap'u gi 'ñet'a ri mu<sub>h</sub>u gi pö<sub>h</sub>u di 'bu'be Jö ar Dada.

<sup>39</sup> Man'agi ya ndöxodyo mi nehmö nda gu, ha bi k'ot'i bi ma.

<sup>40</sup> Nep'u ar Hesu bi mengi bi ma 'randi ar döthe Hordan, habu m'et'o mi xixthehmö ar Xuwa, ne ka ba kohnu'ö.

<sup>41</sup> Ne nzeye ya jö'i mi pa mi tsudi, ne mi eñ'u:

—Majöni nunar Xuwa hinte ma nt'udi bi 'yot'e. Mödi njap'u, gatho nö'ö bi xikagihu mi nonga ar Hesu, xi tho njap'u.

<sup>42</sup> Ne nzeye ya jö'i bi ñ'emui<sub>n</sub>u.

## 11

### *Ár ndöte ar Lasaro*

<sup>1</sup> Mi hñenga n'ar ñ'ohö már thuhu Lasaro me Betania, ar t'ulo hnini habu mar mengu ar Maria, ne ár juhwe ár thuhu ar Marta.

<sup>2</sup> Ar Lasaro nö'ö mi hñeni, már indö ar Maria, togo xki go'spa ar hogañuni hár wa ar Hesu, ne mi ju yá xtö mi thukwabi.

<sup>3</sup> Nuya 'behñö mi njuhwe bi mempa ar mhö nda nsipa ar Hesu njawa:

—Tsi Hmu, nö'ö togo xa gi mödi hñeni.

<sup>4</sup> Mi nsipa ar Hesu njap'u ne bi 'ñeñ'ö:

—Nunar hñeninü hingar ndöte. Njap'u ma da nheki ár nsunda Jö, ne njap'u da nsundabi ár T'u Jö n'ehe.

<sup>5</sup> Ha nu ar Hesu xa mi mö ar Marta, ár juhwe ne ár jödö Lasaro, nuya hñuyu mi nku.

<sup>6</sup> Ne nú'mu mi 'yo mi hñenga ar Lasaro, bi gohnu ma yopa habu mi 'bui.

7 Mi tho nuya yopa, ar Hesu bi 'ñemba yá m̄xte:  
—Möhö Nhudea man'agi.

8 Nuyá m̄xte bi 'ñembabi:  
—Utate, hingar yapa nuya ndöxodyo mi ne nda hyo'a nk'ahnitho. Yo'ö gi ne gi penga injanu man'agi.

9 Ar Hesu bi dödi ne bi 'ñenö:  
—Hage hingi pöhu, nunar pa pe'sa 'ret'amayoho xenimpa. Nu'u togo 'yo 'bu mpa, hingi nthewi ya mfets'e, ngetho yot'wa ar ñot'i yot'a ar ximhai.

10 Ha nö'ö togo 'yo 'bu xui, da nthewi ya mfets'e, ngetho hiñ'othobi ar ñot'i.

11 Mi wadi bi xipabi njap'u, bi 'ñembabi n'ehe:  
—Ma tsi ñ'ohu Lasaro öhö. Ma ga a.

12 Nuyá m̄xte bi 'ñem'u:  
—Tsi Hmu, nu'mu ötho, da dix'mu.

13 Nunar Hesu mi nomba ár ndöte ar Lasaro, ha nu'u mi hu yá muï ar t'öhötho.

14 Nu'mú ar Hesu bi 'ñembabi xiñho:  
—Ar Lasaro xi du.

15 Di johya hinda 'buhnu nú'mu mi hñeni. Gehnu ri ñhohu, ngetho njanu da te ri ñ'emuihu. Möhö ma ga k'ö'su.

16 Nu'mú bi 'ñenga ar Toma nö'ö mi t'embabi ar Didimo ngetho xki m'uhwu man'ár ku, bi 'ñemba nuyá mim̄xtewi:

—Möhö n'ehe, ga tuwihu mahyegi'ö.

*Ar Hesu juxa nu'u xi du ne unga ar te*

17 Mi zonga ar Hesu habu mi 'bu ar Lasaro, bi nsipabi mi pe'sa goho mpa xki t'agi.

18 Ar hnini Betania 'bu get'u ar hnini Herusalen, ngu n'atenthebe ya wëni ár yap'u.

<sup>19</sup> Ne nze<sub>y</sub>e ya xodyo xki ma ba k'ö'sa ar Marta ne ar Maria, nda hñu'mba yá müi ngetho xki du yá indö.

<sup>20</sup> Nu mi 'yo ar Marta ndi 'ñe ar Hesu hár ngu, bi ma ba thödi. Ha nunar Maria bi gota har ngu.

<sup>21</sup> Ne ar Marta bi 'ñemba ar Hesu:

—Ma tsi Hmu'i, nu'mü xka 'buhmowa, ma indö hinxi duhmö.

<sup>22</sup> Mödi di pöpya n'ehe, gatho nö'ö te gi 'yapa Jö da 'ra'i.

<sup>23</sup> Ha ar Hesu bi 'ñembabi:

—Ri indö ma da mengi da nte man'agi.

<sup>24</sup> Nep'u ar Marta bi 'ñembabi:

—Di pödi, har ngöxpä ma da mengi da ntenu, xta mengi da nte gatho nu'u xi du.

<sup>25</sup> Ar Hesu bi 'ñembabi:

—Nuga di juxa nu'u xi du, ne di unga ar te. Nu'u togo ñ'emuigi, mödi xi du, da mengi da nte.

<sup>26</sup> Nu'u togo 'bui ne ñ'emuigi, hiñham'u da du. Ha gi ñ'emuï nö'ö di xi'a'i.

<sup>27</sup> Ar Marta bi 'ñembabi:

—Hö tsi Hmu'i, di ñ'emuï go gar Kristo ár T'u Jö, ndi to'mhe nda ekwa har ximhai.

*Ar Hesu bi nzonga hár t'agi ar Lasaro*

<sup>28</sup> Ngu mi wadi bi mönga njap'u ar Marta, dama ba xipa ar Maria ár juhwe, txi 'ramtx'u bi 'ñembabi:

—Xi zokwa ar Utate ne top'a'i.

<sup>29</sup> Nu mi 'yo'ö, dama bi m'ai ma ba k'öts'i.

<sup>30</sup> Ar Hesu hinxki yut'atho har hnini, ka xki gohnutho habu ma ba thö ar Marta.

<sup>31</sup> Ha nuya xodyo mi 'buhnü hár ngu ar Maria mi hu'mba ár müi, mi hyant'u dama bi nangi bi bonga har ngu, bi deñ'u, ne mi enga n'a ngu n'a:



—Di ma da nzonga hár t'agi ár indö.

<sup>32</sup> Ar Maria nu mi zonga habu mi 'bu ar Hesu, mi hyandi bi ndandihmö hár wa, ne bi 'ñenö:

—Ma tsi Hmu'i, nu'mu xka 'bukwa, hinxi duhmö ma indö.

<sup>33</sup> Nu mi hyanda ar Hesu xa mi zonga ar Maria, ne nuya xodyo mi ñ'owi xa mi zoñ'u n'ehe, xa bi ko ár muï ne xa bi zamañ'u.

<sup>34</sup> Ne bi 'ñeñ'ö:

—Habu ga 'yahü.

Nu'u bi 'ñembabi:

—Ma tsi Hmu'ihe, ba e gi hyandi.

<sup>35</sup> Ne ar Hesu bi nzoni.

<sup>36</sup> Nuya xodyo bi 'ñenga n'a ngu n'a:

—Hyanthu tengu mi mödi.

<sup>37</sup> Ra bi 'ñeñ'u:

—Gehnu togo bi xokwa ár da ar goda. Hage hinge mi tsä te nda mefi ne hinxi duhmö ar Lasaro.

*Ar Lasaro bi mengi bi nte*

<sup>38</sup> Ar Hesu xa bi zamañ'u man'agi, bi ma ba k'ö'spa ár t'agi, mi 'bu ha n'ar oki, ne mi kota n'ar döta do.

<sup>39</sup> Bi 'ñenga ar Hesu:

—Hñöju ar do.

Ha nu ar Marta ár nju nö'ö xki du, bi 'ñenö:

—Ma tsi Hmu'i, xi xöt'i, ngetho pe'sa goho mpa xi du.

<sup>40</sup> Ar Hesu bi 'ñembabi:

—Ha hinxta xi'i, nu'mu gi ñ'emui ma gi hyandwa ár nsunda Jö.

<sup>41</sup> Nep'u nuya jö'i bi hñöka nö'ö ar do mi kot'a ár goxthi habu xki t'a ar Lasaro, ne ar Hesu bi no'sa mhets'i ne bi 'ñenö:

—Ma tsi Dada'i, di jamödi xka 'yoxa nö'ö xta a'a'i.

<sup>42</sup> Di pödi hyax'mu gi oxkagi. Nú'mu da mönga njap'u, di hongá nuya nze ya jö'i xi mhunts'i, da ñ'emui go xka penkagi.

<sup>43</sup> Mi wadi bi mönga njap'u, bi mafi nts'edi ne bi ñenö:

—Lasaro, ponga nthi.

<sup>44</sup> Ne nö'ö xki duhmö, ba poni mi sot'a ya xuni dutu yá 'ye ne yá wa, ne mi 'baxa n'ar nthu'mxi ár ñö. Ar Hesu bi ñemba ya jö'i:

—Xothwu ya dutu, hyehu da ma.

*Ya ndöxodyo bi nkohi hanja nda hyo ar Hesu  
(Mt. 26:1-5; Mr. 14:1-2; Lk. 22:1-2)*

<sup>45</sup> Nzeye ya xodyo nu'u ma ba hu'mba ár mu ar Maria, mi hyant'u nö'ö bi 'yot'a ar Hesu, bi ñ'emui.

<sup>46</sup> Ha ma'ra bi ma ba xipa ya denga'bepate nö'ö xki 'yot'a ar Hesu.

<sup>47</sup> Nu'mu nuya ndömöjö ne ya denga'bepate bi 'yot'a n'ar mhunts'andö, ne bi ñeñ'u:

—Te ga pəhupya. Ngetho nunar ñ'ohonu ot'a nze ye ya nt'udi.

<sup>48</sup> Nu'mu ga hehutho njap'u, gatho ya jö'i ma da ñ'emui. M'efa da e ya me Nroma da hwata ma nijöhu ne ma hninihu.

<sup>49</sup> Nu ar Kaifas n'a nuya möjö mar döngamöjö nor jeye'ö, bi ñembabi'u:

—Nu'ahu hinte gi pöhu.

<sup>50</sup> Hinxka beñhu, xiñho n'ar ñ'ohö da unga ár te da pöta gatho ar hnini, ne njap'u gatho ma haihu hinda m'edi.

<sup>51</sup> Himbi bense nö'ö bi möñ'ö. Ngetho mar döngamöjö nunar jeye'ö, jange Jö bi umba nö'ö bi

mö. Mi enö, nunar Hesu ma nda unga ár te nda pöta ya mengu nunar hai'ö.

<sup>52</sup> Ne hinge hõnse nor hainu, gatho yá bötsi Jö habu gatho xi nxani, da munts'a n'atho.

<sup>53</sup> Jange nor pa'ö nuya ndöyü bi nkohi nda hyo.

<sup>54</sup> Nu'mú ar Hesu bi hyegi mi 'yo ha yá nthandi ya ndöxodyo. Bi ma get'u ha ya ot'at'ohö ha n'ar hnini ár thuhu Efrain, ne ka bi gohwinu yá maxte.

<sup>55</sup> Mi 'bap'utho ar baxjwa, n'ár dango ya xodyo. Nzeye ya jö'i ha yá hai'u bi m'et'o bi ma'u har hnini Herusalen, ma ba nt'axki.

<sup>56</sup> Nú'mü mi 'buhnu har dönganijö mi hongar ar Hesu, ne mi engar n'a ngu n'a:

—Te gi beñhu. Hage hinda e ar dangopya 'mü.

<sup>57</sup> Ha nuya ndömöjö ne ya denga'bepate xki xipabi ya jö'i, nö'ö togo nda bödi habu ndi 'bui, nda da ne nda nju nda njot'i.

## 12

*Ar Hesu bi njo'spabi n'ar hogañuni núnu Betania (Mt. 26:6-13; Mr. 14:3-9)*

<sup>1</sup> Nú'mü mi 'be 'rato mpa nda zo ar baxjwa, ar Hesu ba e har hnini Betania, habu mi 'bu ar Lasaro nö'ö xki duhmö ne bi mengi bi ko'spa ár te man'agi.

<sup>2</sup> Ne ka bi t'ot'wabinu n'ar t'oxi. Ar Marta go mi pöxa ar mexa, ne ar Lasaro mi huhwinu har mexa n'ehe.

<sup>3</sup> Ar Maria n'a mbi hñö n'ar xito, mi ñ'enga ngu made nt'eni n'ar hogañuni xa mar mhödi, ne bi go'spa ár wa ar Hesu. Ne bi gu yá xtö mi thukwabi, ne xöge ar ngu bi ñuxa nor hogañuni'ö.

<sup>4</sup> Ne bi 'ñenga ar Huda Iskariote ár t'u ar Simu, n'a nuyá m̄axte togo ma nda da m'ēfa:

<sup>5</sup> –Yo'ö himbi 'ba nunar hogañuninü, xi t'a n'a njeje ár nthöhö n'ar jö'i, ne xi themba ya tsi hyoya.

<sup>6</sup> Ar Huda bi mönga njap'u, hinge mi tupa ár müi ya hyoya. Bi mö ngetho már bë, ha go mi hö'ö ar 'rozöbojö, ne mi ju nö'ö mi ne'ö.

<sup>7</sup> Ha nunar Hesu bi 'ñembabi:

–Hyehñu. Xi goxka ar hogañuni xki kwati to'ma ár pa ma nt'agi.

<sup>8</sup> Ngetho nuya hyoya hyax'mü ma gi 'buhwihü, ha nuga hinge hyax'mü ma ga 'buhwihü.

*Ar nkohi nda tho ar Lasaro*

<sup>9</sup> Nzeye ya xodyo bi bödi ar Hesu mi 'buhñu Betania, ba e'u ma ba k'öni. Ne hinge honse'ö, mi ne nda nu'u n'ehe ar Lasaro togo xki mengi xki nte man'agi.

<sup>10</sup> Nu'mü nuya ndömöjö bi nko'u nda hyo ar Lasaro n'ehe.

<sup>11</sup> Ngetho nö'ö xki t'ot'wabinü, bi japa nzeye ya xodyo xki 'wege ne xki ñ'emüi ar Hesu.

*Ar Hesu bi yut'a Herusalen ngu n'ar ndö mi tho'mi*

*(Mt. 21:1-11; Mr. 11:1-11; Lk. 19:28-40)*

<sup>12</sup> Ár hyax'ö nzeye ya jö'i xki 'ñe ar dango. Mi 'yo'u ndi 'ñe ar Hesu Herusalen,

<sup>13</sup> bi doka ya denthi, ne bi ma ba thödi xa mi mafi mi eñ'u:

–Xa nsunda Jö. Njöpa ár m'ehni Jö, gehñu ár ndö ya me Israel.

<sup>14</sup> Ar Hesu bi dinga n'ar tsi n'oge ne bi ntoge, njap'u nda tho ngu mönga har T'ofö habü enö:

15 Yo gi ntsuh<sub>u</sub>, menguh<sub>u</sub> Sion;  
hyanth<sub>u</sub> ba ehnu ri Ndöhu,  
nto n'ar tsi n'oge.

16 Nuyá m̄axte himbi zo yá mfeni n'agitho yo'ö  
xki thogi njap'u. Nú'mu mi menga hár nsunda ar  
Hesu, ka bi beñ'u xki t'ot'a gatho nuna tema xki  
njapi.

17 Ne mi damajöni nuya mi 'buhwi hár t'agi ar  
Lasaro, nú'mu mi mat'i ne bi ko'spa ár te xki du.

18 Jange nuya jö'i ba e bi dödi, ngetho xki 'yo'u  
xki 'yot'a ar Hesu nunar nt'udin<sub>u</sub>.

19 Ha nuya denga'bepate bi 'ñense n'a ngu n'a:  
—Hinte xi za te xka pehu. Hyanthuhmö gatho ya  
jö'i di ma teni.

*'Ra ya me Gresia mi hongar Hesu*

20 'Ra ya me Gresia mi 'buhnu, xki ma nda  
ndönga Jö har dango n'ehe.

21 Ne nuy<sub>u</sub> bi wat'a hab<sub>u</sub> mi 'ba ar Lipe ar me  
Betsaida har hai Ngalilea, ne bi 'yapa ar möte bi  
'ñeñ'u:

—Tata, di ne ga hanthe ar Hesu.

22 Ar Lipe bi ma ba xipa ar Andre, ne bi ma ba  
xipabi'u ar Hesu.

23 Ar Hesu bi döt wabi'u ne bi 'ñenö:

—Xi zo ar pa da hñönga ár nsunda mhets'i Nö'ö  
Togo ba e bi Njö'i.

24 Xa majöni di xi'ahu, nu'mu n'ar ndat'ei hinda  
zo har hwöhi ne da du, da gose. Ha nu'mu da du,  
da unga nze<sub>y</sub>e ar sofo.

25 Nö'ö togo xa mö ár te, da 'bedi. Ha nö'ö togo  
da utsa ár tewa har ximhai, ma da me'sa ar te  
hiñham'u da göts'i.

26 Nö'ö togo ne da mepkagi, dá dengagi, ne habu ga 'buka ka da m'u<sub>h</sub>nu n'ehe. Nu'u togo da mepkagi, ma Dada da 'ñe'spa ár nsu.

*Ar Hesu bi mö ma nda tho*

27 Nupya xa di tu ma mu. Te ga apa Jö ma Dada. Hage ga embabi: Ñöngagi hinga tho nunar thogi ba ep'u. Hinda tsa, ngetho xta e ga tho'ö.

28 Ma Dada'i, japa da nsunda ri thuhu.

Bi nheki 'mu n'ar mhö ndi 'ñe mhets'i mi enö:

—Xa xta japi xi nsunda, ne ga japi da nsunda man'agi.

29 Mi 'bu<sub>h</sub>nu nzeye ya jö'i nu'u bi 'yoxa nunar mhönu. 'Ra mi enö xki t'o n'ar ñuni, ma'ra mi enö n'ar enxe xki zo ar Hesu.

30 Ar Hesu bi dödi ne bi 'ñenö:

—Hinge ma ñhoga nunar mhö xpa ehnu mhets'i, xpa hoñ'a ri ñhohu.

31 Xi zo ar pa ya meximhai ma da tho'spa majöni, ne ar ts'ondöhi ár ndö nunar ximhai<sub>u</sub>, ma da thömba ár ts'edi.

32 Nuga, nú'mu xta njuxka har hai ne da ts'utkagi, ma ga tsigase gatho da hyongagi.

33 Bi mönga njap'u, ne nda födi hanja nda du.

34 Ya jö'i bi dödi ne bi 'ñenö:

—Nuje xta pöhe enga har t'ofö, nunar Kristo hinda ma da göxa ár m'ui. Yo'ö gi enö ma da njuxa Nö'ö Togo ba e bi Njö'i. Togo Nuna ba e bi Njö'i 'mu.

35 Ar Hesu bi 'ñembabi 'mu:

—Honse ma'ra ya tsi pa ma gi 'bu<sub>h</sub>wihu ar ñot'i. 'Yohu núpya gi pe'su ar ñot'i, yo ma da zu'ahu ar 'bexui. Ngetho nu'u 'yo har 'bexui hingi handi habu di ma.

<sup>36</sup> Jange núpya gi 'buhwihu ar ñot'i, ñ'emuibihu ne gi mbötsihu ar ñot'i.

Njap'u bi mönga ar Hesu. M'efa bi ma ba ñ'öni habu hinge nda hyant'u.

*Ya xodyo himbi ñ'emuibi ar Hesu*

<sup>37</sup> Mödi ar Hesu xki 'yot'a nzeye ya nt'udi ha yá hmi ya xodyo, nu'u himi ñ'emui.

<sup>38</sup> Bi njanu ne nda tho ngu xki mönga ar m'ehni Isaia nú'mu bi 'ñenö:

Tsi Hmu'i, hinto xi jamfi nö'ö di möñhu.

Hinto xi ñ'emui nuya döta nt'udi xka 'yot'e.

<sup>39</sup> Himi tsá nda ñ'emui'u, ngetho bi 'ñenga ar Isaia n'ehe:

<sup>40</sup> Jö bi gotwa yá da, ne bi japi bi me yá mfeni,

Njap'u hinda xo yá da da hyandi,

ne hinda kwata ha yá mu,

ha nuga da tsá ga umba ar nzaki.

<sup>41</sup> Ar Isaia bi mönga njap'u nú'mu mi hyandwa ár nsunda, ne bi damajöni togonu.

<sup>42</sup> Mödi njap'u, nzeye ya xodyo bi ñ'emuibi ar Hesu, mödi himi damajöni, ngetho mi tsu ya denga'beplate nda 'yenga ha yá nijö.

<sup>43</sup> Ngetho mi honi nda 'ñe'spa yá nsu ya jö'i, hinge jö.

*Ya jö'i ma da duxa yá ts'oki ngetho himbi ñ'emui nö'ö bi mönga ar Hesu*

<sup>44</sup> Ar Hesu bi ñö nts'edi bi 'ñenö:

—Nö'ö togo ñ'emuigi, hinge honse ñ'emuigi, ñ'emui togo xpa penkagi n'ehe.

<sup>45</sup> Ne nö'ö togo handgagi ma m'ui, handwa ár m'ui nö'ö togo ba penkagi.

46 Nuga go dar ñot'i, xta ekwa har ximhai. Gatho nu'u togo da ñ'emugi, hinda m'u har 'bexui.

47 Nö'ö togo xi 'yoxa nö'ö xta mö ne hinda 'yot'e, hingo ma ga ent'wa ár mfei. Ngetho hinxta eka ga ent'wa ár mfei ya meximhai, xta e ga poka'u.

48 Nö'ö togo utsagi ne hingi ne da ñ'emui nö'ö di mö, 'ñe togo da 'yent'wa ár mfei, gehnu ar mhö xta xi'ahu, go da 'yent'wa ár mfei'ö har ngöxapa.

49 Ngetho hinxta bense nö'ö xta mö. Ma Dada togo ba penkagi, bi xikagi teme ga mö ne ga xipa ya jö'i.

50 Ne di pödi, nö'ö te xi 'bepkagi, gehnu da xi'ahu, ne da 'ra'ahu ar te hiñham'u da göts'i. Jange nö'ö di mö di tenda ngu xi xikagi ma Dada.

## 13

### *Ar Hesu bi xukwayá wa yá maxte*

1 Mi 'bap'utho ar dango mbaxjwa. Ar Hesu mi pödi xki zo ar pa nda zokwa ar ximhai, ne nda menga habu bi 'bu ár Dada. Nö'ö bi mödi nu'u mi 'bukwa har ximhai mi teni, xa bi mö'u gatho ya pa bi m'ukwa.

2 Ha nú'mu mi nt'ox'u, ar ts'ondöhi xki wadi xki 'yent'wa hár mu ar Huda Iskariote, ár t'u ar Simu, nda da ar Hesu.

3 Mi pö ar Hesu ár Dada xki 'yent'wa gatho hár 'ye, ne xki 'ñe habu mi 'bu'ö, ne ma nda mengnu man'agi,

4 jange mi nt'oxi, n'a mbi nangtho, bi mo ár pat'i, bi gu n'ar dutu bi böt'i.



<sup>5</sup> Nep'u bi xit'a ar dehe ha n'ar döngmohi, ne bi ndui bi xukwa yá wa yá maxte. Ne mi ju ar dutu mi böt'i, mi thukwabi.

<sup>6</sup> Ha nú'mu ma nda xukwabi yá wa ar Pedro, bi ñeñ'ö:

—Ma tsi Hmu'i, hage ma gi xuga ma wa.

<sup>7</sup> Ar Hesu bi dödi ne bi ñenö:

—Nö'ö tema di pepya hingi tso ri mfeni, ne m'efa ma gi pödi.

<sup>8</sup> Ar Pedro bi ñembabi:

—Hinga ñhegi gi xuga ma wa.

Ar Hesu bi döti:

—Nu'mu hinga xuk'a'i, hinte ma njawi.

<sup>9</sup> Ne bi ñenga ar Simu Pedro:

—Ma tsi Hmu'i, nu'mú, honge honse gi xuga ma wa, xuga ma 'ye ne ma ñö.

<sup>10</sup> Ar Hesu bi ñembabi:

—Nö'ö togo xi wadi xi nxaha, xi nt'axki, honse mahyoni da xuka yá wa. Ne nu'ahu xi nt'axk'a'ihu, mödi hingi gathohu.

<sup>11</sup> Ngetho mi pö'ö togo ma nda da, jange bi ñenö: Hinga gatho xi nt'axk'a'ihu.

<sup>12</sup> Nú'mu mi wadi bi xukwa yá wa yá maxte, bi gu bi mat'a ár pat'i, ne bi mengi bi hñu har mexa, bi ñembabi'u:

—Ha gi pöhu tema di bonga nö'ö xta ja'ahu.

<sup>13</sup> Nu'ahu gi engagihu dar Utate ne dar Hmu. Majöni nö'ö gi xiju, ngetho hö njap'u.

<sup>14</sup> Ngu xka möñhu, nuga dar Hmu ne dar Utate xta xuk'ahu ri wahu. Nu'ahu n'ehe mahyoni gi xukwabihu yá wa n'a ngu n'a ri ñ'ohu.

<sup>15</sup> Nuga xta ut'ahu gi tenthü ngu xta otka, njap'u gi 'yothü n'ehe.

16 Xa majöni di xi'ahü, n'ar 'bego hingi töpa ár nsu ár Hmu, ngu n'ar m'ehni hingi töpa ár nsu togo xi mehni.

17 Nu'ahü gi pöhu nö'ö di xi'ahü, ne nu'mü gi 'yothü, xa xi njöp'ahü.

18 Hinga gatho'ihü di noñ'ahü, di pöka togo xta hwañ'ahü. Honse mahyoni da thogi ngu mönga har T'ofö habü enö: Nö'ö togo di ñhe'be ar thuhme, bi guxa ár 'ye bi doxkagi.

19 Di xi'ahüpya hingi thotho, ne nú'mü xta thogi, gi ñ'emüihü go geke.

20 Xa majöni di xi'ahü, nö'ö togo numansu ma m'ehni, numansugi. Ha nö'ö togo numansugi, numansu togo ba penkagi.

*Ar Hesu bi mö nda da ar Huda*

*(Mt. 26:20-25; Mr. 14:17-21; Lk. 22:21-23)*

21 Mi wadi bi mönga njap'u ar Hesu, xa bi du ár müi, ne bi 'yot'wa ar 'ñu yá maxte tema ndi bonga nuya mhö, ne bi 'ñenö:

—Xa majöni di xi'ahü, n'a gi 'buhüwa ma gi dagagihü.

22 Nuyá maxte mi nk'öt'a n'a ngu n'a, himi pö'u togo mi noni.

23 N'ár maxte togo ar Hesu xa mi mödi, mi huhwi get'u.

24 Jange ar Pedro bi ja ár 'ye nda 'yambabi togo mi noni.

25 Nu'mü, nunar maxtenu bi njwaxa hár tiñö ar Hesu, ne bi 'ñembabi:

—Ma tsi Hmu'i, togo'ö.

26 Ar Hesu bi dödi ne bi 'ñenö:

—Nö'ö togo ma ga umba ar thuhme xi mobo, go ge'ö.

Bi mo ar thuhme ne bi umba ar Huda Iskariote ár t'u ar Simu.

<sup>27</sup> Mi wa ar Huda bi zi nunar xenithuhmenu, ar ts'ondöhi bi yut'a hár mfeni. Nu'mú ar Hesu bi 'ñembabi:

—Nö'ö ma gi pefi, 'yot'a ngut'a.

<sup>28</sup> Nu'u mi huhnu har mexa, hinto bi bödi yo'ö mi xipabi njap'u.

<sup>29</sup> Ra mi beni mi emba ar Hesu: Di ma ba tanga tema di hoñhu har dango. Wa mi embabi nda ma nda umba n'a tui ar bojö ya hyoya, ngetho ar Huda go mi kwata ar bojö.

<sup>30</sup> Nú'mu mi wadi bi zi ar xenithuhme, dama bi boni bi ma. Mar m'exui 'mu.

*Ar 'ra'yo 'bepate*

<sup>31</sup> Nu mi boñ'ö, ar Hesu bi 'ñenö:

—Nupya ma da nheki ár nsunda Togo ba e bi Njö'i, ne ma da ñ'u ár nsunda Jö xta tho ya thogi.

<sup>32</sup> Nú'mu xta ñ'u ár nsunda Jö, Jö ma da ñ'u ár nsunda'ö n'ehe, ne ngut'a ma da njap'u.

<sup>33</sup> Ma tsi bötsi'ihu, hinga ma ga 'buhwihu nzeye ya pa. Ma gi hyongagihu, ne ngu xta xipabi ya xodyo, di xi'ahu n'ehe: Habu gar maga, hinda tsa gi möhu.

<sup>34</sup> Di 'bep'ahu n'ar 'ra'yo 'bepate, gi mhöhu n'a ngu n'a. Ngu xta mö'ahu, njap'u gi mhöhu n'ehe.

<sup>35</sup> Nu'mu xa majöni gi mhöhu n'a ngu n'a, njap'u gatho ya jö'i ma da bödi ma maxte'ihu.

*Ar Hesu bi mö ma nda kongga ar Pedro*

*(Mt. 26:31-35; Mr. 14:27-31; Lk. 22:31-34)*

<sup>36</sup> Ar Simu Pedro bi 'ñembabi:

—Tsi Hmu, habu gi ma.

Ar Hesu bi 'ñembabi:

—Habū gar maga, hinda tsa gi tengagipya, mödi m'efa hö, gi tengagi.

<sup>37</sup> Ar Pedro bi 'ñembabi:

—Ma tsi Hmu'i, yo'ö hingi tsa ga teñ'apya. Di 'bui ga unga ma te ga teñ'a'i.

<sup>38</sup> Ar Hesu bi döti:

—Hage gi 'bui gi unga ri te. Xa majöni di xi'a'i, m'et'o ma gi kongagi hñu'gi, ne ka da ma ar boxi.

## 14

*Ar Hesu ger 'ñu'ö di ma n'a habu bi 'bu ar Dada*

<sup>1</sup> Yo gi tu ri muihu. Gi ñ'emuihu Jö, ñ'emuihu n'ehe.

<sup>2</sup> Núnu habu bi 'bu ma Dada, bi ja nzege ya ngu. Nu'mu hindi njap'u, xta xi'ahu n'agitho. Gar manu 'mu, ma ga hok'ahu habu gi 'buhu.

<sup>3</sup> Ne xka ma ga hok'ahu habu gi 'buhu, ma ga pengase ga tsix'ahu, ne njap'u mahyegi ga 'buhuihu, ne habu ga 'buka ka gi 'buhunu n'ehe.

<sup>4</sup> Gi pohu habu gar ma, ne gi pohu ar 'ñu.

<sup>5</sup> Ar Toma bi 'ñembabi:

—Tsi Hmu, hindi pohe habu gi ma. Hanja ma ga pohe ar 'ñu.

<sup>6</sup> Ar Hesu bi 'ñembabi:

—Nuga dar 'ñu, dar majöni ne dar te. Hinjo'o togo da zonga habu bi 'bu ma Dada nu'mu hindi tengagi.

<sup>7</sup> Nu'mu gi pökahmögihu, gi pöhmöhu ma Dada n'ehe. Di ndu ar pania, xka pohu ne xka hanythu.

<sup>8</sup> Ha ar Lipe bi 'ñembabi:

—Tsi Hmu, honse di nehe gi utkagihe ar Dada.

<sup>9</sup> Nu'mu ar Hesu bi 'ñenö:

—Xta 'buhwihu nze<sub>y</sub>e ya pa. Hanja hinxka pökagi, Lipe. Nö'ö togo xi hyandgagi, xi hyanda ma Dada. Hanja gi enge: Utkagihe ar Dada.

10 Hage hingi ñ'emui di n'at'be ar Dada. Nuya mhö di xi'ahu, hinxta bense, ngetho ar Dada togo di 'bu'be go ot'a ar 'befi'ö.

11 Ñ'emuihu nuga di n'at'be ar Dada. Nu'mu hingi ñ'emui<sub>g</sub>ihu nö'ö di mö, ñ'emui<sub>g</sub>ihu ngetho di ot'a nuya 'befiyu.

12 Xa majöni di xi'ahu, nö'ö togo ñ'emui<sub>g</sub>i ma da 'yot'a nuya 'befi di otka n'ehe, ne da dökagi da 'yot'e, ngetho gar maga habu bi 'bu ma Dada.

13 Ne gatho nö'ö tema gi 'yafu ma Dada gi thötju ma thuhuga, nuga ma ga ot'ahu, ne njap'u nuga ár T'ugi ga e'spa ár nsu ar Dada.

14 Nu'mu tema gi 'yafu Jö gi thötju ma thuhu, ga otga.

### *Ar Hesu bi mö nda mehna ár Hñö Jö*

15 Nu'mu gi mökagihu, 'yothu nö'ö di 'bep'ahu.

16 Ne nuga ma ga apa Jö ma Dada da meñ'ahu man'a togo da hup'a ri muihu, ne ma gi 'buhwihu gatho ya pa.

17 Ge'ö ár Hñö Jö togo mönga majöni. Ne nuya jö'i hingya gamfi hinda tsa da hñöñ'ö, ngetho hingi handi, ne hingi pö'u togo'ö. Ha nu'ahu hö, gi pöhu, ngetho gi 'buhwihu, ne ma da m'u ha ri muihu.

18 Hinga ma ga hek'asehu. Ga pengi ga 'buhwihu man'agi.

19 Ma'ra ya tsi patho, ne nuya jö'i hinda ma da hyandgagi, ha nu'ahu ma gi hyandgagihu. Ngetho nuga di te, nu'ahu n'ehe ma gi ntehu.

20 Nuya pa'u ma gi pöhu di n'atho'be ma Dada, ne gi n'at'wihu ma m'ui, ne di n'at'wi ri m'uihu.

21 Nö'ö togo ot'a nö'ö di 'bepabi, go mökagi. Ne nö'ö togo mökagi, ma Dada ma da mödi n'ehe, ne nuga ma ga mödi, ne ma ga ñ'udi da hyandga ma m'ui.

22 Nu'mú ar Huda (hinge ar Iskariote) bi ñ'emba ar Hesu:

—Ma tsi Hmu'i, yo'ö honse ma gi ñ'udi ga hant'ahe ri m'ui, ha nu ma'ra ya jö'i hin'ö.

23 Ar Hesu bi dödi ne bi ñembabi:

—Nö'ö togo mökagi, da 'yot'a nö'ö di mö. Ne ma Dada da mödi, ne ga e'be ga 'buhe n'at'wu'ö.

24 Nö'ö togo hingi mökagi, hingi ot'a nö'ö te di mö. Ha nö'ö ar mhö xka 'yöhu, hingo xta mönse, ár meti ma Dada togo xpa penkagi.

25 Xta xi'ahuyu núpya di 'buhwihu.

26 Ha nunár Hñö Jö togo ar Humamui, ma da mehna ma Dada potka ma thuhu, go da ut'ahu ne da beñ'ahu gatho te xta xi'ahu.

27 Di tsok'ahu gi 'buhu n'ar hogam'ui ngu di 'buka, hinge ngu nunar m'ui unga ar ximhai. Jange yo gi tu ri muihu, yo gi ntsuhu.

28 Ngu xka 'yöhu xta xi'ahu, ma ga ma, ne ga pengi ga 'buhwihu. Nu'mu gi mökhmöhu, xka njohyahu númu nda xi'ahu: Gar ma habu 'bu ma Dada. Ngetho töpka ma nsu.

29 Di xi'ahupya nö'ö hinxi thotho, ne númu xta njap'u gi ñ'emuihu.

30 Hinga ma ga ñöwihu nze ye ya pa, ngetho ba ep'u ár ndö nunar ximhainu, ne nö'ö hinte di nja'be.

<sup>31</sup> Di ne da bö ya meximhai di mö ar Dada, jange di ot'a ngu 'bepkagi'ö. Nanju, möhö ga poñhuwa.

## 15

### *Ar 'bai'obxi ne yá 'ye*

<sup>1</sup> Nep'u ar Hesu bi 'ñembabi yá maxte:

—Nuga go dar 'bai'obxi majöni, ne ma Dada gehnu togo su.

<sup>2</sup> Nu'u togo di 'bu'be, jangu yá 'ye ar 'bai'obxi. Nu'u yá 'ye uni, nö'ö togo su da hoki xiñho, honi xa da du. Ha nu'mu hinte uni, da meki.

<sup>3</sup> Nu'ahu xi hok'ahu xiñho nuya mhö xta xi'ahu.

<sup>4</sup> Kwathu ga 'buhwihu. Jangu ar 'yeza hingi tsa te da uni nu'mu hingi thöt'a hár 'bai, njap'utho'ihu n'ehe, nu'mu hindi 'buhwihu, hinte mañho gi uñhu.

<sup>5</sup> Nuga go dar 'bai'obxi, ha nu'ahu yá 'ye. Nö'ö togo di 'bu'be, nunu xa unga ar ñho. Ha nu'mu hindi 'bu'be, hinte tsa te da mefi.

<sup>6</sup> Nö'ö togo hindi 'bu'be, ma da t'enga har ñöni ngu n'ar 'yeza, ne da 'yot'i. Nep'u da njo, ne da t'u'sa har tsibi habu da nzo.

<sup>7</sup> Nu'mu xa gi umba ri muihu ga 'buhwihu, ne di oda ri mfenihu ma mhö, 'yahu gatho nö'ö gi nehu ne da t'a'ahu.

<sup>8</sup> Nu'mu xa gi uñhu ar ñho, njap'u nheki ár nsunda ma Dada, ne njap'u gi 'ñuhu go ma maxte'ihu.

<sup>9</sup> Ngu xi mökagi ar Dada, njap'u di mö'ahu n'ehe. Yo ma gi 'wehu, 'buhu ha ma mhöte.

<sup>10</sup> Nu'mu gi 'yothu nö'ö xta 'bep'ahu, gi 'buhu ha ma mhöte 'mu, jangu xta ot'a nö'ö xpa 'bepkagi ma Dada, ne di 'bu hár mhöte'ö.

11 Di xi'ahū njap'u ne ga thok'ahū ma johya, ne da nxoge ri johyahū.

12 Gehnū ma 'bepate: Gi mhöhū n'a ngu n'a ngu xta mö'ahū.

13 Hiñ'otho man'ar mhöte di töpa ár nsu, da unga ár te da pō yá ñ'ohū.

14 Nu'ahū go ma ñ'ohū nu'mū gi 'yothū nö'ö di 'bep'ahū.

15 Nupya hindi nu'ahū ngu n'ar 'bego, ngetho n'ar 'bego hingi pödi tema pe ár hmu. Ha nu'ahū ma ñ'ohū, ngetho gatho nö'ö xta ode xi mönga ma Dada, xta xi'ahū n'ehe.

16 Nu'ahū hinga hwankagihu, nuga go da hwañ'ahū, ne xta ex'ahū gi möhū, ne da nheki ri hoga 'befihū hiñham'u da thege. Njap'u gatho nö'ö gi 'yafū ma Dada gi potju ma thuhu, da 'ra'ahū.

17 Nö'ö di 'bep'ahū: Mhöhū n'a ngu n'a.

### *Nu'u hingya gamfi ma da utsa'ihu*

18 Nú'mū xta utsa'ihu ya jö'i, beñhū bi utsagiga m'et'o.

19 Nu'mū ár meti'ihuhmö ar ximhai, nuya meximhai da mö'ahū ngu mö yá mi meximhaiwi. Ha nu'ahū hingyá meti'ihu, ngetho nuga nú'mū nda hwañ'ahū, da zoñ'ahū mada ya meximhai, jange utsa'ihu.

20 Beñhū nö'ö xta xi'ahū, ar 'bego hingi töpa ár nsu ár hmu. Nö'ö togo xi utsagi, ma da utsa'ihu n'ehe. Ha nu'mū xi 'yot'a nö'ö xta mö, ma da 'yot'ahū nö'ö gi xipabihu n'ehe.

21 Ha nu'u togo da utsa'ihu, ma da jap'u ngetho xka ñ'emūgihu, ne hingi pö'u togo xpa penkagi.



<sup>22</sup> Nu'mu hinxta ekahmö ne hinxta zohmö nuya jö'iyu, hinte ma ts'oki di tuhmöyu. Ha xta ehe xta xipabi, jange hiñ'otho te da dö'u.

<sup>23</sup> Nö'ö togo utsagi, pontho utsa ma Dada n'ehe.

<sup>24</sup> Nu'mu hinxta ñ'uhmö ya nt'udi nö'ö hinto man'a xi za xi 'yot'e, hinte ma ts'oki di tuhmö'u. Ha xi hyandya nt'udi, ne xi utsagi mahyegi'be ma Dada.

<sup>25</sup> Xi njap'u ne nda tho ngu mönga ha yá t'ofu habu enö: Xi utsagi mödi hinte xta japabi'u.

<sup>26</sup> Ne ma ga peñ'ahu ar Humamui, gehnu ár Hñö Jö mönga majöni, di 'ñe habu bi 'bu ma Dada. Nunu da dat'ahu majöni togogi.

<sup>27</sup> Nu'ahu n'ehe ma gi dathwu majöni ma'ra togogi, ngetho har nduitho ndi 'buhwihu.

## 16

<sup>1</sup> Di xi'ahu njap'u, ne hingi 'wehu xta 'ñep'u ya nt'utsa.

<sup>2</sup> Ma da t'eñ'ahu ha ya nijö, ne ma da zo ya pa nú'mu togo ma da hyo'ahu, njap'u pepa Jö emp'ö.

<sup>3</sup> Nu'u ma da 'yot'ahu njap'u, ngetho hingi pö'u togo ma Dada, ne hingi pö'u togogi.

<sup>4</sup> Xta xi'ahu nuya mhöyu, ne nú'mu xta tho njap'u, gi beñhu xta xi'ahu m'et'o.

### *Ár 'befi ár Hñö Jö*

Hinda xi'ahu njap'u ár ndui, ngetho ndi 'buhwithohu.

<sup>5</sup> Ha nupya ma ga penga habu bi 'bu togo ba penkagi. Ne hinto xka 'yangagihu habu gar ma.

<sup>6</sup> Honse xa gi tu ri muihu ngetho xta xi'ahu njap'u.

7 Majöni di xi'ahü, gi to'mhü ri ñhohü nu'mü gar maga. Nu'mü hinga ma, hinda e ar Humamüi. Ha nu'mü ga ma, ma ga pemp'ahü gi 'buhwihü.

8 Nu xta zo'ö, ma da hñu'mba yá hmi ya jö'i, da bö'u xa tu yá ts'oki, hanja da m'u xiñho, ne Jö ma da hñö'spa majöni.

9 Ma da utwabi'u xa tu ya ts'oki, ngetho hingi ñ'emügi.

10 Ma da utwabi hanja da m'ui xiñho, ngetho nuga ma ga penga man'agi habü bi 'bü ma Dada, ne hinge ma gi hyandgagihü.

11 Ne da utwabi ar thöxamajöni, ngetho nö'ö togo ndöwa har ximhai, xi wadi xi thu'spa ár mfei.

12 Di pe'sta ma nzeye tema ga xi'ahü, ha nupya hinda tsä ga ut'ahü, ngetho hinda tsä da zo ri mfenihü xoge.

13 Nu xta ep'u ár Hñö Jö nö'ö mönga majöni, ma da 'yot'ahü xiñho ar 'ñu nö'ö majöni. Ngetho hinda ma da mönga nö'ö bense, ma da mönga nö'ö xi 'yode, ne da xi'ahü nö'ö tema da tho m'efa.

14 Ma da ñeska ma nsu, ngetho ma da gunka ma meü ne da ut'ahü.

15 Gatho nö'ö ár meü ma Dada ma meü n'ehe, jange xta xi'ahü da gunka ma meü ne da ut'ahü.

*Ma da the ar dumüi, ma da zo ar johya*

16 'Be 'ra ya tsi pa, ne hinge ma gi hyandgagihü. Ne da tho ma'ra ya tsi pa, ne ma gi hyandgagihü man'agi, ngetho gar ma habü bi 'bü ma Dada.

17 Nu'mü 'ra yá maxte mi enga n'a ngu n'a:

—Tema di bönga nö'ö te mö enö: 'Be 'ra ya tsi pa, ne hinge ma gi hyandgagihü. Ma da tho ma'ra ya

tsi pa, ne gi pengi gi hyandgagihu, ngetho gar ma habu bi 'bu ma Dada.

<sup>18</sup> Mi eñ'u:

—Tema di bonga nö'ö eñ'ö: 'Be 'ra ya tsi pa. Hindi pöhu tema ne da mö.

<sup>19</sup> Ar Hesu bi bötho tema mi ne nda 'yambabi'u, jange bi 'ñembabi'ö:

—Yo'ö gi ñ'añhu n'a ngu n'a nö'ö te xta xi'ahu: 'Be 'ra ya tsi pa, ne hingi hyandagihu. Ne ma da tho ma'ra ya tsi pa, ne gi hyandgagihu man'agi.

<sup>20</sup> Xa majöni di xi'ahu, xa ma gi nzoñhu ne ma gi thohu ar dumui, ha nuya meximhai ma da njohya. M'efa nuna ri dumuihu ma da thege, ne ma da e ar johya.

<sup>21</sup> Ma gi njahu ngu n'ar 'behñö tho ya ugi ngetho xi zo ya pa da m'u ár bötsi. Ha nu xta wadi da m'u ár bötsi, da pumhnitho ar ugi bi thogi, di töte ar johya pets'i, ngetho xi zokwa n'ar bötsi har ximhai.

<sup>22</sup> Gi njahupya, xa gi tu ri muihu. Ha nú'mu xka pengi ga hant'ahu, xa ma gi njohyahu, ne hinto ma da hñöñ'ahu nunar johyanu.

<sup>23</sup> Nuya pa'u hinte ma nt'ani gi 'yangagihu. Xa majöni di xi'ahu, gatho nö'ö gi 'yapabihu ma Dada gi nonju ma thuhu, go da 'ra'ahu'ö.

<sup>24</sup> Hinte xka 'yapathohu gi nonju ma thuhu. 'Yafu ne da t'a'ahu, njap'u da nxoge ri johyahu.

### *Ar Hesu bi dö ar ximhai*

<sup>25</sup> Nö'ö xta xi'ahu xta mönga m'ede. Ma da zo ar pa hinga zo'ahu njap'u. Ma ga xi'ahu n'agitho togo ma Dada, ne njap'u da zo xiñho ri mfenihu.

<sup>26</sup> Nuya pa'u ma gi 'yapabihu ma Dada gi nonju ma thuhu. Di xi'ahu hinge mahyoni ga apa ma Dada da 'yot'ahu.

<sup>27</sup> Gese ma Dada mö'ahu, ngetho xka mökagihu, ne xka ñ'emuihu xta e habu bi 'bu'ö.

<sup>28</sup> Ndi 'bu habu bi 'bu ma Dada, ne xta ekwa har ximhai. Ma ga tsokwa ar ximhai, ne ga penga man'agi habu bi 'bu ma Dada.

<sup>29</sup> Nuyá maxte bi 'ñembabi:

—Nupya gi ñö xiñho, ne hinte ma 'bede gi mö.

<sup>30</sup> Xi zo ma mfenihepya gi pö gatho, hinge mahyoni te da t'añ'a'i. Jange di ñ'emuihe xka e habu bi 'bu Jö.

<sup>31</sup> Ar Hesu bi döt wabi'u ne bi 'ñenö:

—Hage gi ñ'emuihupya.

<sup>32</sup> Pöhu ma da ep'u ar pa, ne di xi'ahu, 'bap'u tho nú'mu ma gi mfonthu. N'a ngu n'a ma gi juhu ri 'ñuhu, ne ma gi hyegasehu. Mödi hinga ma ga 'buse, ma ga 'bu'be ma Dada.

<sup>33</sup> Xta xi'ahu njap'u, gehnu da ja'ahu gi 'buhu ter entho ga 'buhwihu. Nuwa har ximhai ma gi thohu ya thogi. Yo gi tu ri muihu, ngetho nuga xta tö ar ximhai.

## 17

### *Ar Hesu apa ar Dada da ma'spa ya maxte*

<sup>1</sup> Mi wadi bi mönga njap'u, ar Hesu bi no'sa mhets'i ne bi 'ñenö:

—Ma Dada'i, xi zo ar pa da göxkwa nö'ö xka 'bepkagi ga ot'e. 'Ñe'spa ar nsu ri T'ugi, ne nuga ga es'a ri nsuge n'ehe.

<sup>2</sup> Ngetho xka 'raka ar ts'edi töpa gatho ya meximhai, ga umba ar te hiñham'u da göts'i nu'u togo xka datka ha ma 'ye.

<sup>3</sup> Gehnu ar te hiñham'u da göts'i: da bö'a'i honse'i gar Jö majöni, ne da bökagi dar Hesukristo togo xka penkagi.

<sup>4</sup> Nuga xta jwata ma 'befi xka 'rakagi, njap'u xta ñ'u ri nsundawa har ximhai.

<sup>5</sup> Ma tsi Dada'i, koska ma nsunda ga 'buhwi habu gi 'bui, ne njap'u da nheki ma nsu, ngu nunar nsu ndi pe'skwi nú'mu hinxki thoktho ar ximhai.

<sup>6</sup> Xta utwabi togo'i nuyu xka hwahna har ximhai, ne xka 'yentk'a ha ma 'ye. Go ma ri meti ne xka 'rakagipya. Nuyu xi 'yot'a gatho ngu xka penkagi ga xipi.

<sup>7</sup> Nupya pöhyu, gatho nö'ö di pefi, go xka 'bepkagi.

<sup>8</sup> Ngetho xta xipa nö'ö xka xikagi, ne nuyu xi hñöni. Ne xi böhyu majöni xta ehe habu ndi 'buhwi, ne xi ñ'emui go xka penkagi.

<sup>9</sup> Nuga di a'i gi suyu. Hinge di a'i gi su nu'u hingya gamfi, di a'i gi su nuyu togo xka 'rakagi, ngetho go ri meti n'ehe.

<sup>10</sup> Gatho nö'ö ma meti go ri meti n'ehe, ne nö'ö ri metige go ma meti n'e. Gehyu xa japabi xi nheki ma nsunda.

<sup>11</sup> Ma ga hegi di 'buka har ximhai, ngetho gar map'u habu gi 'bui. Ha nuyu ma da m'ukwatho har ximhai. Ma tsi Dada'i xa xint'axi'i, nuya xka 'rakagi, suyu har ts'edi ri thuhu, ne da n'athoyu, nguju di n'athowi.

<sup>12</sup> Nú'mu ndi 'bu'bewa har ximhai, go ndi suga har ts'edi ri thuhu hinge nda 'wege. Nu'u ga

'rakagi ndi su, hinto bi m'edi, hõnse nõ'õ xki t'ent'i nda m'edi, ne nda tho ngu huxa har T'ofõ.

<sup>13</sup> Nupya ma ga map'u habu gi 'bui. Nú'mu di 'bukwatho har ximhai di mönga nuya mhöyu, njap'u ga thokwabi ma johya ne da nxoge yá johyayu.

<sup>14</sup> Xta umbabi ri mhöyu. Ne ar ximhai bi utsa, ngetho hingyá meti ar ximhai, nguga hingo ár metigi ar ximhai.

<sup>15</sup> Hindi a'i gi juka har ximhai, hõnse di a'i gi ñõni hinte da japa ar ts'ondõhi.

<sup>16</sup> Nuyu hingyá meti ar ximhai, nguga hingar metigi ar ximhai.

<sup>17</sup> Di a'i gi utwabi nõ'õ majõni, ne da 'yent'a yá te da mep'a'i. Nuna ri mhõ gehnu majõni.

<sup>18</sup> Jangu xka penkagi har ximhai, njap'u xta penkayu har ximhai n'ehe.

<sup>19</sup> Nuga di homba yá ñhoyu. Gesegi di ent'a ma te ha ri 'befi, ne njap'u nuyu n'ehe da 'yentyá te ha ri 'befi, ngetho pöhyu nõ'õ majõni.

<sup>20</sup> Hinge hõnse di a'a'i gi faxyu. Faxats'u nu'u togo ma da ñ'emugi n'ehe xta 'yo yá mhõ damajõniyu.

<sup>21</sup> Ne da n'athoyu ngu di n'athowi, ma tsi Dada'i, ngetho nu'ge ne nuga di 'buhwi mahyegi. Ne ga n'at'wihuyu n'ehe, ne njap'u ya meximhai da ñ'emui go xka penkagi.

<sup>22</sup> Ngu nõ'õ ar nsunda xka 'rakagi, njap'u ga thokwabiyu n'ehe, ne da n'athoyu ngu di n'athowi.

<sup>23</sup> Nuga ma ga 'bu'beyu, ne nu'ge di 'buhwi. Njap'u di n'athoyu, ne ya meximhai da bödi xka penkagi, ne xa gi möhyu ngu xka mökagi.

<sup>24</sup> Ma tsi Dada'i, núyü xka 'yentk'a ha ma 'yē, di ne da m'ü habü di 'buka, ne da hyanda nö'ö ar nsunda xka 'rakagi; ngetho ngi möki nú'mü hinxki thoktho ar ximhai.

<sup>25</sup> Ma tsi hoga Dada'i, nuya jö'i hingya gamfi hinxi bö'i. Ha nuga di pö'i, ne nuyü xka 'rakagi pöhyü n'ehe go xka penkagi.

<sup>26</sup> Xta utwabiyyü togo'i ne tengu ri m'üi, ne hinga ma ga tsayä ga utwabi. Ne njangu xka mökagi, nuyü n'ehe da me'sa nunar mhöte'ö ha yá müi, ne ma ga 'bu'begayü.

## 18

### *Ar Hesu bi mhihi*

*(Mt. 26:47-56; Mr. 14:43-50; Lk. 22:47-53)*

<sup>1</sup> Ar Hesu mi wadi bi mönga njap'ü, bi mewi yá maxte bi 'rañ'ü ar hñe ár thuhu Nsedro. Mi 'buhnü n'ar hwöza, ne ka bi yutnü.

<sup>2</sup> Ha nu ar Huda, togo bi da ar Hesu, mi pödi habü mi 'bü nunar hwöhinü, ngetho nzeye ya pa ar Hesu xki mewinü yá maxte.

<sup>3</sup> Jange ar Huda bi zixa n'a mut'i ya ndogu xki 'ñe har ts'üt'wi, ne 'ra ya ndogu mi su ar nijö, xki mehna ya ndömöjö ne ya denga'bepate, bi mayü mi hö ya ñot'i, ya tunza, ya za ne ya jwai.

<sup>4</sup> Ar Hesu mi pötho tema nda 'ñepabi, jange bi m'et'o ma ba thödi, ne bi 'ñembabi'ü:

—Togo gi hoñhü.

<sup>5</sup> Nu'ü bi dödi ne bi 'ñeñ'ü:

—Di hoñhe ar Hesu me Nasare.

Ar Hesu bi 'ñembabi'ü:

—Go geke.

Ne mi ñ'owi'ü n'ehe ar Huda togo mi da.

6 Nú'mu mi 'ñembabi'u: Go geke, nu'mú bi nthixtha ne bi hwank'u.

7 Ar Hesu bi mengi bi 'ñembabi'u:

—Togo gi hoñhu.

Nu'u bi 'ñeñ'u:

—Ar Hesu me Nasare.

8 Ar Hesu bi dõt wabi:

—Xta xi'ahu, go geke. Nu'mu gi hongagihu, hyehu da ma nuyu di ñ'o'be.

9 Bi njap'u ne bi tho ngu xki möñ'ö xki 'ñenö: Gatho nu'u xka 'rakagi, di pe'stho, hinto xta 'bedi.

10 Nu'mú ar Simu Pedro n'a mbi k'osta n'ar ndojwai mi nxöts'i, ne bi dakwa ár gu hár ñ'eí ár 'bego ar ndömöjö. Nor 'bego'ö már thuhu ar Malko.

11 Ar Hesu bi 'ñemba ar Pedro 'mu:

—Kwata nor ndojwai hár nt'o. Ngetho nunar nt'eni xinju xi hñuska ma Dada, hage ga hep'u hinga tsi 'mu.

*Ar Hesu bi ts'ixa ma ba m'amba ar ndömöjö*

*(Mt. 26:57-58; Mr. 14:53-54; Lk. 22:54)*

12 Nep'u nunar mut'inu ya ndogu mi ñ'owi yá ndö, ne ya ndogu mi su ar nijö xki mehna ya dönziandö, bi gu ar Hesu ne bi xot'e.

13 M'et'o bi ts'i'spa ar Anas, ngetho már ndohñö ar Kaifas togo mar döngamöjö nor jeye'ö.

14 Nunar Kaifasnu gehnu togo xki xipa ya ndöxodyo mar ñho nda duse n'ar ñ'o'ho, hinga gatho ya jö'i.

*Ar Pedro mi 'bu hár thi ár ngu ar Anas*

*(Mt. 26:69-70; Mr. 14:66-68; Lk. 22:55-57)*

15 Ha nu ar Simu Pedro ne nö'ö man'a ár mimaxtewi mi teñ'u ar Hesu mi nju. Nö'ö man'ar



m̄axte m̄ár mpödi ar döngamöjō, jange bi yut'a hár thi ar ngu.

16 Har Pedro xki go nthi har goxthi. Jange ba e nö'ō man'ar m̄axte mi mpöhwi ar döngamöjō, bi xipa ar 'behñō mi su ar goxthi, nda hye ar Pedro nda yut'i.

17 Nu'mú nor 'behñō mi su ar goxthi bi 'ñemba ar Pedro:

—Ha hingo ngi ñ'owi nor ñ'ohõnu n'ehe.

Ar Pedro bi dödi ne bi 'ñenö:

—Hin'ō, nuga hin'ō.

18 Nuya 'bego ne nuya sunijō xki 'ñu'u n'ar tsibi ngetho mar ntse, mi 'bahnu mi mpat'u. Ar Pedro mi 'bahnu n'ehe.

*Ar Anas bi 'yot'wa ya nt'ani ar Hesu*

*(Mt. 26:59-66; Mr. 14:55-64; Lk. 22:66-71)*

19 Ha nu ar döngamöjō bi 'yamba ar Hesu tema xki ja yá m̄axte ne ár nt'uti.

20 Ar Hesu bi dödi ne bi 'ñenö:

—Nuga hinte xta otká ñ'õntho. Nö'ō di mö xta mönga ha ya t'ulo nijō ne har dönganijō habu tsonga gatho ya xodyo.

21 Yo'ō gi angagihu. 'Yambabihu nu'u togo xi 'yoxkagi, go pō'u tema xta mö.

22 Nu mi mönga njap'u ar Hesu, n'ar sunijō bi umba n'ar mpetgu ne bi 'ñenö:

—Hage njap'u gi thöta ar döngamöjō.

23 Ar Hesu bi 'ñembabi:

—Gi enö xta ñōmañ'u. Hage da za gi hñubga ma hmi. Ha nu'mu xta ñō xiñho, yo'ō xka febgagi 'mu.

24 Nu'mú ar Anas bi mehna ar Hesu xki nsot'e, nda ts'ixa habu mi 'bu ar Kaifas togo mar döngamöjō.

*Ar Pedro bi konga ar Hesu**(Mt. 26:71-75; Mr. 14:69-72; Lk. 22:58-62)*

<sup>25</sup> Ar Pedro mi 'ba get'u ar tsibi mi mpat'i, ne bi t'embabi:

—Hage hinga ge'e n'ár maḡte n'ehe.

Nö'ö bi nkoni ne bi 'ñenö:

—Hin'ö, nuga hin'ö.

<sup>26</sup> N'ár 'bego ar döngamöjō már mēni nö'ö togo bi hyekwa ár gu ar Pedro, bi 'ñembabi:

—Hage hinda hant'a'i ngi 'bahwi'ö har hwöza.

<sup>27</sup> Ar Pedro bi mengi bi nkoni, ne bi ma ar boxi.

*Ar Hesu mā ba m'amba ar Pilato**(Mt. 27:1-2, 11-31; Mr. 15:1-20; Lk. 23:1-5, 13-25)*

<sup>28</sup> Mi takxuditho nú'mu mi njuka ar Hesu hár ngu ar Kaifas, ne bi ts'ixa har döta ngu habu mi 'bu ya ndö me Nroma. Nuya ndöxodyo himbi ne bi yut'u, himi ne nda jaxt'a yá m'ui, ne nda tsä nda zi ar baxjwa.

<sup>29</sup> Nu'mú, ba ponga ar Pilato ne bi 'ñembabi'u:

—Tema gi hoḡu nunar ñ'ohonu.

<sup>30</sup> Nu'u bi dödi ne bi 'ñeñ'u:

—Nu'mu hinte ma ts'oki xi 'yoḡmō, hinxta tsiñ'ahe 'mu.

<sup>31</sup> Ar Pilato bi dötwabi'u:

—Tsixu ne 'yoḡwu ar ts'ut'wi ngu mönga ri t'ofohu.

Ha nuya xodyo bi 'ñembabi:

—Nuje hingi thegagihe togo ga hohe.

<sup>32</sup> Bi njap'u ne nda thogi ngu xki mönga ar Hesu, nú'mu xki mönga hanja nda du.

<sup>33</sup> Ar Pilato bi mengi bi yut'a har döta ngu, ne bi zohna ar Hesu, ne bi 'ñembabi:

—Hage gár ndöge ya xodyo.

34 Ar Hesu bi dōtwabi njawa:

—Nö'ö xka mö, ha gi mönse, wa togo xi xi'a'i.

35 Ar Pilato bi dödi ne bi 'ñenö:

—Hindar xodyoga. Nuya ri mixodyowi ne ya ndömöjō go xpa tsi'a'i ha ma ts'ut'wi. Te xka 'yot'e.

36 Ha nu ar Hesu bi dödi:

—Numa ts'ut'wiga hinga gekwa har ximhai. Nu'mu di njap'uhmō, nu'u togo tengagi xi ntuhni ne xi ñöngagi, hinxi ndatkagi ya ndöxodyo. Ngetho numa ts'ut'wiga hingar menguwa.

37 Ar Pilato bi 'ñembabi 'mu:

—Hage gar ndöge 'mu.

Ar Hesu bi dödi ne bi 'ñenö:

—Hö, ngu xka mö dar ndö. Jange da m'ui ne xta ekwa har ximhai ga mönga nö'ö majöni. Gatho nu'u tenga nö'ö majöni, oxa nö'ö di mö.

38 Ar Pilato bi 'ñenö:

—Teme nö'ö majöni.

Mi wadi bi mönga njap'u, bi bonga nthi ma ba k'önga ya xodyo man'agi, ne bi 'ñembabi'u:

—Hinte ma ts'oki di timbabinu.

39 Nu'ahu gi pe'su n'ar nt'umbi di hek'ahu n'ar 'yofadi har dango mbaxjwa. Ha gi nehu ga hek'ahu ri Ndöxodyohu.

40 Nu'mú gatho bi mengi bi ma'u ne bi 'ñeñ'u:

—Hindi nehe gi hyehnu. Hye ar Baraba.

Ha nu ar Baraba mar bë.

## 19

1 Nu'mú ar Pilato bi japi nda n'wext'a ar Hesu.

2 Ne nuya ndogu bi me n'ar ntsant'i ya 'mini ne bi hñu'spabi. M'efa bi gö'spa n'ar thenga dutu xa xki zi.

3 Ne bi 'ñeñ'u:

—Xa ar tsi te, ár Ndö'i ya xodyo.

Ne mi umba ya mpetgu.

<sup>4</sup> M'efa ar Pilato bi bonga man'agi ne bi 'ñemba ya xodyo:

—Hyanthu di tsiñ'ahuwa nunar ñ'ohonu. Nusehu hinte ma ts'oki xta timbabi.

<sup>5</sup> Nu mi bonga ar Hesu mi hu'sa ya 'mini xki m'e, ne mi he ar thenga dutu, bi 'ñenga ar Pilato:

—Xi 'bukwa nunar ñ'ohonu.

<sup>6</sup> Mi hyanda nuya ndömöjö ne ya sunijö, bi ndui bi mafi ne mi eñ'u:

—Tsuta har pont'i, tsuta har pont'i.

Bi 'ñenga ar Pilato:

—Tsixu ba tsuthu har pont'i ngu xka möñhu, ngetho nuga hinte ma ts'oki di timbabinu.

<sup>7</sup> Nuya xodyo bi döt wabi ne bi 'ñeñ'u:

—Nunu xi 'ñense ár T'u Jö, jange mahyoni da tho, ngetho njap'u enga ha ma t'ofophe.

<sup>8</sup> Nu mi 'yo njap'u ar Pilato bi hñuxa ár ntsu.

<sup>9</sup> Ne bi mengi bi yut'a har döta ngu, ne bi 'ñemba ar Hesu:

—Habü gar mengu.

Ar Hesu hinte bi döti.

<sup>10</sup> Jange ar Pilato bi 'ñembabi:

—Ha hingi ne gi thödi. Wa hingi pödi di pe'sa ar ts'edi ga ja'a'i da ts'ut'a har pont'i, wa da tsä ga hek'a'i gi ma n'ehe.

<sup>11</sup> Ar Hesu bi dödi ne bi 'ñenö:

—Hinte ma ts'edi gi pe'shmö nu'mu hinte xi 'ra'a Jö. Jange nö'ö togo xi 'yentk'agi ha ri 'ye, go töte ár ts'oki tux'ö.

<sup>12</sup> Mi wa ar Hesu bi mönga njap'u, ar Pilato xa bi umba ár müi mi honi hanja nda hyegi. Ha nuya ndöxodyo xa mi mafi mi eñ'u:

—Nu'mü gi hye nunar ñ'ohonü, hingár ñ'owi ar Sesar. Ngetho gatho nu'u ñ'exase ngu n'ar ndö, gehyü yá ñ'uniwi'ö.

<sup>13</sup> Nu mi 'yo njap'u ar Pilato bi guka ar Hesu. Ne bi hñuxa hár nthuts'i habü hōxa majöni, mi 'bü har Gabata har mhö ebreo, di boni da 'ñenö har Nt'ut'ado.

<sup>14</sup> Mi 'be n'apa nda zo ar dango mbaxjwa, ngu made mpa nú'mü ar Pilato bi 'ñemba ya ndöxodyo:

—Ndi, 'bukwa ri ndöhu.

<sup>15</sup> Ha nuya ndöxodyo bi ma'u ne bi 'ñeñ'u:

—Tsits'i ba tsuta har pont'i.

Ha nu ar Pilato bi 'ñembabi'u:

—Hage gi nehü ga tsut'a ri ndöhu.

Nuya ndömöjö bi dödi ne bi 'ñenö:

—Honse ar Sesar di 'ñehe ngu ar ndö, hinto man'a.

<sup>16</sup> Jange bi datwa ha yá 'ye'u nda tsut'u har pont'i, ne nuya ndöxodyo bi gü ar Hesu bi zix'u.

*Ár nts'uti ar Hesu har pont'i*

*(Mt. 27:32-44; Mr. 15:21-32; Lk. 23:26-43)*

<sup>17</sup> Ar Hesu bi boni mi muxa ár pont'i habü ma nda ts'uti, ndi ma har Nñöxhmundo'yo, har hñö ebreo t'embabi Golgota.

<sup>18</sup> Ne ka bi ts'utnü har pont'i. Ne bi ts'utnü ma yoho n'ehe, har Hesu bi go madetho.

<sup>19</sup> Ar Pilato bi 'yot'a n'ar döta thuhu, ne bi hñuxa mañö ar pont'i, mi enö njawa: Gehnü ar Hesu me Nasare, ár Ndö ya xodyo.

<sup>20</sup> Nunar thuhunu bi ne nzeye ya xodyo; ngetho habu xki ts'uti mi get'u ar hnini, ne mi huxa har hñö ebreo, ar griego ne ar latin.

<sup>21</sup> Nuya ndöxodyo bi 'ñemba ar Pilato:

—Yo gi ot'a: Ár Ndö ya xodyo. Di nehe gi 'yot'a njawa: Go mi eñ'ö ár Ndö ya xodyo.

<sup>22</sup> Ar Pilato bi dödi ne bi 'ñenö:

—Nö'ö xta ot'i, njap'u da gohi.

<sup>23</sup> Nuya ndogu mi wadi bi tsuta ar Hesu, bi gumpa yá dutu nda 'yot'a goho xeni, ne nda hñöxa n'a xeni n'a ngu n'a. Bi gumpa ár pat'i n'ehe, nunu mi n'adar m'e xki t'ot'e xki ndu mañö ndi göxa hai.

<sup>24</sup> N'a mbi bentho ne bi 'ñeñ'u:

—Hinga zejü. Ma ga ensu n'ar nthöhö ga nuhu togo da hñöts'i.

Gathoyu bi njap'u, ne bi tho ngu mi enga har T'ofu habu huts'i njawa:

Bi ñhe'u ma dutu,

Ne bi 'yensa ar nthöhö nda nu togo nda hñöska ma he.

Ne bi jap'u ya ndogu.

<sup>25</sup> Get'u har pont'i habu xki ts'uta ar Hesu, ka mi 'bahnu ár nönö ne ár juhwep'u'ö, ar Maria ár 'behñö ar Kleofa, ne ar Maria me Magdala.

<sup>26</sup> Ar Hesu mi hyanda ár nönö ne ár maxte togo xa mi mödi mi 'bahnu n'ehe, bi 'ñemba ár nönö:

—Nönö, xi 'bap'u ri t'u.

<sup>27</sup> Nep'u bi 'ñemba ár maxte togo xa mi mödi:

—Hyandi, xi 'bahnu ri nönö.

Ne nor pa'ö nunar maxtenu bi zixa hár ngu bi su.

*Ar Hesu bi du*

*(Mt. 27:45-56; Mr. 15:33-41; Lk. 23:44-49)*

28 M'efa mi bö ar Hesu xki jwata xoge, bi 'ñenö:  
—Di tuthe.

Njap'u bi tho ngu mönga har T'ofö.

29 Mi 'buhnu n'ar mohi mi po ar ixkat'afi. Bi nju n'ar xi'yo bi mpobo, bi nthuta ha n'ar t'o ne bi njwatwa hár ne.

30 Ar Hesu mi wadi bi zi ar ixkat'afi bi 'ñenö:  
—Xi göxa xoge.

Ne bi ts'a'ma ár ñö, bi da ár hñö bi du.

*Ar Hesu bi nsu'spa ár 'bots'e*

31 Mi 'be n'apa nda dat'a ar dango mbaxjwa. Jange ya ndöxodyo ma ba apa ar möte ar Pilato nda n'wakwabi yá wa nu'u xki ts'uti. Ne nda njömba yá ndo'yo, hinge nda gop'u har pont'i nö'ö ar pa ntsaya. Nunar panu mar nts'upi.

32 Jange ba e 'mu ya ndogu, ne bi 'wakwa yá wa nö'ö ar 'bet'o ne nö'ö ár ñ'owi xki ts'utwi.

33 Ha nú'mu mi zonga habu mi zu ar Hesu, himbi 'wakwa yá wa, ngetho bi hyant'u xki du.

34 Ne n'a nuya ndogu bi gu n'ar maza, bi su'spa ár 'bots'e, ne bi k'onts'a ar ji ner dehe.

35 Ha nö'ö togo bi hyandi go damajöni, jange pödi xiñho majöni nö'ö te mö. Ne pet'ahu, njap'u gi ñ'emuihu n'ehe.

36 Bi njap'u ne nda tho ngu mönga har T'ofö habu enö: Hinte ma ndo'yo nda n'wakwabi.

37 Man'ár xeni ar T'ofö enö njawa n'ehe: Ya jö'i da hyanda nö'ö togo bi sunse'u.

*Ár nt'agi ar Hesu*

(Mt. 27:57-61; Mr. 15:42-47; Lk. 23:50-56)

38 Mi wa xogeyu, ar Huse me Arimatea, togo mi tenga ar Hesu n'ehe, mödi ñ'öntho ngetho mi tsu yá

mi ndöxodyowi, bi ma ba apa ar Pilato nda umba ar seki nda hñö'spa ár ndo'yo ar Hesu. Ne ar Pilato bi umbabi, jange bi ma ba hömpabi.

<sup>39</sup> Ar Nikodemo n'ehe togo ba e mi nxui bi k'önga n'agi ar Hesu, ba hö ar bopo ár thuhu ar mira, mi nthöskwi man'ar hogañuni ár thuhu aloe, mi thongu n'atema'ret'a ya nts'uti ár ñhu.

<sup>40</sup> Jange bi gu'u ár ndo'yo ar Hesu, bi go'spa ya hogañuni, ne bi maxa ya dutu, ngu yá nt'umbi ya xodyo mi a yá jö'i.

<sup>41</sup> Get'unu habu xki ts'uta ar Hesu mi 'buhnu n'ar hwöza, ne har hwöza mi 'buhnu n'ar 'ra'yo t'agi hinto xki t'agi.

<sup>42</sup> Jange ka bi t'ahnu'ö, ngetho mi get'utho, ne ma nda ndu ar pa ntsaya.

## 20

### *Ar Hesu bi mengi bi nte*

(Mt. 28:1-10; Mr. 16:1-8; Lk. 24:1-12)

<sup>1</sup> Ár m'et'o mpa ar hñöto, ar Maria me Magdala bi ma ra n'itho mi nxuitho har t'agi, ne bi hyandi xki thöka ar do mi kothmö'ö.

<sup>2</sup> Nu'mú, dama bi nixt'i ma ba xipa ar Simu Pedro ne nö'ö man'ar maxte xa mi mö ar Hesu, bi ñembabil'u:

—Xi thö'spa ár ndo'yo ar tsi Hmu mi 'bu har t'agi, ne hindi pöhe habu xpa 'bokwe.

<sup>3</sup> Dama bi bönga ar Pedro ne nö'ö man'ar maxte, bi ma'u har t'agi.

<sup>4</sup> Xa bi hye ar nhixt'i gatho yoho, ha nö'ö man'ar maxte bi ntöte ár nihi, jange bi zonga m'et'o.

<sup>5</sup> Bi kaka ár ñö ne bi hyanda ya xuni dutu mi 'buhnu, ha himbi yut'i.



<sup>6</sup> Ne mi zo ar Simu Pedro n'ehe mi 'befa, dama bi yut'i ne bi hyanda ya xuni dutu mi 'bonu.

<sup>7</sup> Ne bi hyanda nunar nthu'mxi xki 'ba'spahmö ár ñö ar Hesu, himi nthöskwi nu ma'ra ya xuni dutu, mi 'buse xki ntot'i xiñho.

<sup>8</sup> Bi yut'a nö'ö man'a xki zo m'et'o, ne bi hyanda gatho nö'ö te mi ja mbo, ne bi ñ'emui.

<sup>9</sup> Nuya pa'u hinxki zoda yá mfeni nö'ö mönga har T'ofu, mi enö mi mahyoni ar Kristo nda mengi nda nte man'agi.

<sup>10</sup> Ne bi menk'u habu mi 'bu yá ñ'owi.

*Ar Hesu bi ñ'udi nda hyanda ar Maria me Magdala*

*(Mr. 16:9-11)*

<sup>11</sup> Nunar Maria me Magdala mi 'ba nthi hár goxthi ar t'agi mi zoni, bi kaka ár ñö bi hyanda mbo.

<sup>12</sup> Ne bi hyanda yoho ya enxe mi he ya t'axdutu, mi huhnu habu xki 'bokwa ár ndo'yo ar Hesu, n'a habu xki gohmö ár ñö, ne man'a habu xki gohmö yá wa.

<sup>13</sup> Ne bi 'ñenga nuya yohoyu:

—Ha gi ode nö'ö. Yo'ö gi zoni.

Nö'ö bi dödi:

—Di zoni ngetho xi thö'spa ár ndo'yo ma tsi Hmu, ne hindi pödi habu xpa ts'ogi.

<sup>14</sup> Nu mi wadi bi mönga njap'u, bi ñegi ne bi hyanda ar Hesu mi 'bahnu, ne himbi bödi ha go mi ge'ö.

<sup>15</sup> Ar Hesu bi 'ñembabi:

—Ha gi ode, nö'ö. Yo'ö gi zoni. Togo gi honi.

Nunar 'behñö mi beni mar suhwöhiza, jange bi 'ñembabi:

—Tata, nu'mu xka hñö'spa ár ndo'yo ma tsi Hmu, xikagi habu xka tsogi, ne ma ga hö.

<sup>16</sup> Ar Hesu bi 'ñembabi:

—Maria.

Nu'mú ar Maria bi 'bat'i ne bi 'ñembabi:

—Raboni (di boni da 'ñenö, Utate).

<sup>17</sup> Ar Hesu bi 'ñembabi:

—Yo gi thangagi, ngetho hinxta mada habu bi 'bu ma Dada. Di ma ba xipa ma ku gar ma habu bi 'bu ma Dada ne ri Dadahu, ma Jö ne ri Jöhu.

<sup>18</sup> Ar Maria me Magdala bi ma ba xipa yá maxte xki hyanda ar Hesu, ne bi metwa nö'ö xki nsip'ö.

*Ar Hesu bi ñ'udi nda hyanda yá maxte  
(Mt. 28:16-20; Mr. 16:14-18; Lk. 24:36-49)*

<sup>19</sup> Nu mi nxui nor 'bet'o pa'ö, nuyá maxte xki got'a gatho ya goxthi habu xki mhus'u ngetho mi tsu ya xodyo, ba e ar Hesu bi m'a madetho, ne bi 'ñembabi'u:

—'Buhu ter entho.

<sup>20</sup> Nu mi xipa njap'u, bi utwa yá 'ye ne ár 'bots'e, ne nuyá maxte xa bi njohya bi hyanda ar tsi Hmu.

<sup>21</sup> Ar Hesu bi 'ñemba man'agi 'mu:

—'Buhu ter entho. Ngu bi menka ma Dada, njap'u di peñ'ahu n'ehe.

<sup>22</sup> Nu mi wadi bi xipa njap'u, bi hwifi ne bi 'ñembabi'u:

—Hñöñhu ár Hñö Jö.

<sup>23</sup> Nu'u togo gi pumbabihu yá ts'oki, da mpumbabi. Ha nu'u hingi pumbabihu, ma da duxta yá ts'oki.

*Ar Toma himbi ñ'emui*

24 Nunar Toma n'a yá máxte ar Hesu, mi t'embabi ar Didimo ngetho xki m'uhwi mahyegi man'ár ku, himi 'buhnū nú'mū mi zo ar Hesu.

25 Bi 'ñemba nuyá mi máxtewi:

—Xta hanthe ar tsi Hmu.

Nö'ö bi 'ñenö:

—Nu'mū hinga handwase yá 'ye habu bi mfo'spa ya bojö, ne ga fota ma xa, m'efa ga fota ma 'ye hár 'bots'e, nu'mū hin'ö, hinga ñ'emui.

26 Ár hñötop'u man'agi mi 'bu yá máxte mbo ar ngu, ne ar Toma n'ehe. Bi yut'a ar Hesu nú'mū mi jot'a ya goxthi, bi m'a madetho ne bi 'ñembabi'u:

—'Buhū ter entho.

27 Ne bi 'ñemba ar Toma:

—Xö ri xa, hyandga xiñho ma 'ye. Höwa ri 'ye, fota ha ma 'bots'e. Yo gi yomi, ñ'emuiigi.

28 Ar Toma bi dödi ne bi 'ñembabi 'mū:

—Ma tsi Hmu'i, ma Jö'i.

29 Ar Hesu bi 'ñembabi:

—Toma, ga hyandgagi jange ga ñ'emui. Ha nzatho nu'u hinxi hyandgagi ne xi ñ'emuiigi.

### *Yo'ö bi t'ot'a nunar he'minu*

30 Ar Hesu bi 'yot'a ma nzeye ya nt'udi hár nthandi yá máxte, ne hingi huxkwa har t'ofonu.

31 Nuyu xi t'ot'i, ne da tsa gi ñ'emuihu nunar Hesu gehnu ar Kristo ár T'u Jö, ne xki ñ'emuihu gi pe'su ar te hiñham'u da göts'i.

## 21

### *Ar Hesu bi ñ'udi bi hyanda yoto yá máxte*

1 Mi wadi bi tho gathoyu, ar Hesu bi ñ'udi man'agi nda hyanda yá máxte núnu hár ñöni ar ñhontho Tiberia. Njanu bi ñ'udi:

<sup>2</sup> Mi 'yo mahyegi ar Simu Pedro, ar Toma togo mi nsipabi ar Didimo ngetho xki m'uhwi man'a, ar Natanael ar mengu Kana har hai Ngalilea, nuyá t'u ar Sebedeo, ne ma yoho yá m̄axte.

<sup>3</sup> Ar Simu Pedro bi 'ñemba nu ma'ra:

—Gar ma ar njuxhwö.

Bi dö'u:

—Ga teñ'ahe n'ehe.

Bi ma'u, bi bōxa ha n'ar motsa, ne nor nxui'ö hinte bi gux'u.

<sup>4</sup> Nú'mu 'butho nda hats'i, bi nheki ar Hesu mi 'ba har ñönthe, ha himi pö'u ha go mi ge'ö wa hin'ö.

<sup>5</sup> Nö'ö bi 'ñembabi'u:

—Ñ'ohu, ha hinte xka juxu n'ar hwö ga tsahu.

Bi dö'u:

—Hin'ö.

<sup>6</sup> Ar Hesu bi 'ñembabi'u:

—Köthu ar nt'ats'i hár ñ'ei ar motsa, ne gi juxu.

Bi göt'u, ne himi tsá nda guts'i, ngetho xa mi nzeye ya hwö.

<sup>7</sup> Nu'mú nö'ö ar m̄axte xa mi mö ar Hesu bi 'ñemba ar Pedro:

—Gehnu ar tsi Hmu.

Nu mi 'yo njap'u ar Pedro, dama bi hye ár dutu ngetho xki moge, ne bi 'yenga ar nsagi har dehe bi bonga ñ'anthe.

<sup>8</sup> Nu ma'ra ba e mi e ar motsa, mi jut'a ar nt'ats'i mi ku ya hwö, ngetho himar yap'u ar ñönthe, ngu n'anthebe ya ñhufi ár yap'u.

<sup>9</sup> Ha nu mi gö'u har ñönthe, bi hyant'u mi janu ya despi habu mi oxa n'ar hwö, ne mi janu ya thuhme n'ehe.

<sup>10</sup> Ar Hesu bi 'ñembabi'u:

—Ba höhuwa 'ra ya hwö ja xka juxu.

11 Bi boxa ar Simu Pedro har motsa, ne bi gut'a ar nt'ats'i bi guka har ñöni. Xa mi ñuxa ya hwö, mi tsu n'anthebe ne ngudmihñu ya döta hwö. Mödi mi nzeye himbi xe ar nt'ats'i.

12 Ar Hesu bi 'ñembabi'u:

—Ba ehü gi nzimxudihü.

Gatho mi tsu, hinto bi 'yambabi, togo'i. Mi pö'u mar tsi Hmu.

13 Ba e ar Hesu bi gu ar thuhme ne bi umbabi'u, ne bi jap'utho ar hwö n'ehe.

14 M'efa xki mengi xki nte man'agi ar Hesu, ár hñu'ginu mi ñ'udi nda hyanda yá maxte.

### *Suka ma deti*

15 Nú'mu mi wadi bi ñuñ'u, ar Hesu bi 'ñemba ar Simu Pedro:

—Nu'ge Simu, ár T'u'i ar Honas, hage m'et'o gi mökagi, ne ka gi möhyü.

Bi do'ö ne bi 'ñenö:

—Hö ma tsi Hmu'i, gi pöke di mö'a'i.

Ar Hesu bi 'ñembabi 'mu:

—Suka ma belo.

16 Bi mengi bi xipa ár ño'gi:

—Simu, ár t'u'i ar Honas, ha gi mökagi.

Ar Pedro bi dödi ne bi 'ñenö:

—Hö ma tsi Hmu'i, gi pöke di mö'a'i.

Nö'ö bi 'ñembabi:

—Taga ma deti.

17 Bi 'ñemba ár hñu'gi:

—Simu, ár T'u'i ar Honas, ha gi mökagi.

Ar Pedro bi zot'a ár mu'i xki xipa ár hñu'gi, ha gi mökagi. Ne bi döti:

—Ma tsi Hmu'i, gi pöke xiñho gatho. Gi pödi di mö'a'i.

Ar Hesu bi 'ñembabi:

—Suka ma deti.

<sup>18</sup> Xa majöni di xi'a'i, nú'mu ngi bötsi, ngi ngut'ase ri böt'i, ne ngi ma habu ngi nege. Ha nú'mu xki ndönzia, gi juxa ri 'ye, man'a da dut'a ri böt'i, ne da ts'ix'a habu hingi nege.

<sup>19</sup> Bi 'ñenga njap'u mi xipa ar Pedro hanja nda du ne nda nsundabi Jö, ne bi 'ñembabi n'ehe:

—Tengagi.

*Ar maxte xa mi mhödi*

<sup>20</sup> Nep'u ar Pedro bi ñegi, ne bi hyanda nunar maxte xa mi mö ar Hesu. Get'ö togo xki njwaxa hár tiñö ar Hesu nu ar nxui mi tsi ar t'oxi, ne xki 'ñembabi: Tsi Hmu, togo ma da dā'a'i.

<sup>21</sup> Ar Pedro nu mi hyant'ö, bi 'yamba ar Hesu:

—Tsi Hmu, xipyanu.

<sup>22</sup> Ar Hesu bi 'ñembabi:

—Nu'mu di nega da m'utho nú'mu xka pengi, tema gi ñ'ange. Nu'ge tengagi.

<sup>23</sup> Nunar 'bedenu bi nunga ha gatho ya gamfi, mi mhö nunar maxtenu hingi ma nda du. Himbi 'ñembabi hingi nda du'ö, honse bi 'ñenö: Nu'mu di nega da m'utho nú'mu xka pengi, tema gi ñ'ange.

<sup>24</sup> Gehnu ár maxte ar Hesu togo damajöni te bi thogi, ne bi 'yot'i, ne di pöhu majöni nö'ö möñ'ö.

<sup>25</sup> Ja ma nzeje ya 'befi bi 'yot'a ar Hesu. Nu'mu togo da 'yot'a n'a ngu n'a, di beni gatho ar ximhai hinda ñ'enga ya he'mi'u. Dá njap'u.

**Àr 'ra'yo nkohi Jö har ñhöñhö maxei ntongwi  
ár mahwifí har hai m'onda ne har ñhömfó  
New Testament in Otomi, Querétaro (MX:otq:Otomi,  
Querétaro)**

copyright © 2009 Wycliffe Bible Translators, Inc.

Language: Otomi, Querétaro

Translation by: Wycliffe Bible Translators, Inc.

Otomi, Querétaro

otq

Mexico

**Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Otomi, Querétaro

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.  
Pictures included with Scriptures and other documents on this site are  
licensed just for use with those Scriptures and documents. For other uses,  
please contact the respective copyright owners.

2014-04-30

---

PDF generated using Haiola and XeLaTeX on 21 Feb 2024 from source files  
dated 29 Jan 2022

a3e32dbb-4826-53d8-92fc-afaa86ffff04